

四庫全書

經部

欽定四庫全書

經部

春秋左傳注疏卷五十三

四

詳校官監察御史臣王爾烈

給事中臣溫常綬覆勘

覆校官中書臣汪日章

校對官中書臣王夔憲

謄錄監生臣戴朝琛

欽定四庫全書

春秋左傳注疏卷五十三

起昭公二十九年盡三十二年

晉杜氏注

唐陸德明音義

孔穎達疏

經二十有九年春公至自乾侯居于鄆注以乾侯至不

得見晉侯故疏

注正義曰二十五年公孫于齊齊侯唁公于野井二十六年經書公至自齊公

雖不至齊都既

入齊境得與齊侯相見故書公至自齊

往年公如晉次

于乾侯雖入晉境不得與晉侯相見故

書至自乾侯以乾侯致告於廟者為不得見晉侯故

齊侯使高張來唁公注唁公

至晉不見受高張高偃子音義

唁音彦

疏

注正義曰詩毛傳曰弔失國曰

宣二十五年公新失國齊侯唁公可矣於此復唁公者
公以齊不憂已棄而適晉望得晉人矜之晉侯不肯見
公齊侯心復恨公嫌公此舉故遣唁公所以嗤笑公
也故云唁公至晉不見受又似更復失國故唁之

公如晉次于乾侯注復不見受往乾侯音義

復扶
又反

夏四月庚子叔詣卒注無傳

秋七月

冬十月鄆潰注無傳民逃其上曰潰潰散叛公音義

潰戶

對疏

注正義曰民逃其上曰潰文三年傳例也公自二
反疏十六年以來常居于鄆此時公既如晉必留人守

鄆鄆人潰散而叛公使公不
得更來當是季氏道之使然

傳二十九年春公至自乾侯處于鄆齊侯使高張來

唁公稱主君注比公於大夫疏

注正義曰傳稱范宣子撫荀偃云事吳敢

不如事主醫和謂趙文子曰主是謂矣如此之類大夫稱主傳文多矣今高張以齊侯之命稱公為主君

以晉不受公故輕侮之比公於大夫也

子家子曰齊卑君矣君祇辱焉

注言往事齊適取辱音義

祇音支

公如乾侯注為齊所

卑故復適晉冀見恤音義

復扶又反

三月己卯京師殺

召伯盈尹氏固及原伯魯之子注皆子朝黨也稱伯

魯子終不說學音義

召上照反說音悅

尹固之復也注二十

八年尹固與子朝俱奔楚而道還疏

注正義曰尹固復還之年傳雖

不載以婦人尤之云其過三歲乎知以

有婦人遇之

周郊尤之曰處則勸人為禍行則數日而反是夫也

其過三歲乎夏五月庚寅王子趙車入于鄆以叛陰

不佞敗之注趙車子朝之餘也見王殺伯盈等故叛

鄆周邑音義

數所主反
鄆列勉反

平子每歲賈馬注賈買也

音義

賈古
買反

具從者之衣屨而歸之于乾侯公執歸馬

者賣之注賣其馬乃不歸馬衛侯來獻其乘馬曰啓

服注啓服馬名音義

乘如字疏

注正義曰釋畜云馬前右足白啓郭璞曰左傳

曰啓服詩曰兩服上襄鄭玄云兩服中央夾轅者此馬毛色名啓公用以夾轅故以啓服為名也塹

而死注隋塹死也音義

塹七反

公將為之櫛注為作棺

也音義

將為如字一音于偽反櫛徒木反為作于偽反下同

子家子曰從者病

矣請以食之乃以幃裏之注禮曰敝幃不棄為埋馬

也音義

食音似裏古火反

疏

注正義曰檀弓文也禮有埋馬之法子家子請以馬肉食從者

以公將為之櫛所以深抑之公感子家子之言方始依禮以帷裏之史記滑稽傳云楚莊王有所愛馬衣以文繡置之華屋之下席之以路牀啗之以棗脯馬病肥死欲以棺槨大夫禮葬之優孟者故楚之樂人

也多辯常以談笑風諫於是入門大笑王驚而問其故優孟曰馬者王之所愛也以楚國之大何求不得而以大夫禮葬之薄請以人君禮葬之王曰何如對曰臣請以雕玉為棺文梓為椁發甲卒為穿壙老弱賁土廟食太牢奉以萬戶之邑諸侯聞之皆知大王賤人而貴馬也王曰寡人過一至於此為之奈何優孟曰請大王以六畜葬之以壙竈為椁銅厝為棺齊以薑桂薦以木蘭祭以粳稻衣以火光葬之人腸於是王乃使以馬屬大官無令天下聞之彼亦此之類也

公賜公衍羔裘使獻龍

輔於齊侯注龍輔玉名疏

注正義曰周禮使澤國用龍節皆金也以英蕩輔之

杜子春云蕩謂以函器盛此節謂鑄金為龍以玉為函輔盛龍節謂之龍輔此獻函不獻節故直云獻龍輔玄卿云盛龍節之玉函耳案說文云龍禱旱玉也為龍文又玉人云上公用龍今輔與龍連文故云龍

輔王名蓋
用此意

遂入羔裘齊侯喜與之陽穀注陽穀邑名

公衍公為之生也其母偕出注出之產舍疏

注正義曰內則

云妻將生子及月辰居側室夫使人日再問之作而
自問之妻不敢見使姆衣服而對至于子生夫復使
人日再問之夫齊則不入側室之門子生男子設弧
於門左女子設悅於門右三日始負子男射女否然
則產舍是側室也

公衍先生公為之母曰相與偕出請相與

偕告注留公衍母使待已共白公三日公為生其母
先以告公為為兄公私喜於陽穀而思於魯曰務人
為此禍也注務人公為也始與公若謀逐季氏且後

生而為兄其誣也久矣乃黜之而以公行為大子○

秋龍見于絳郊注絳晉國都音義

見賢遍反下見龍朝夕見皆同

魏

獻子問於蔡墨注蔡墨晉太史曰吾聞之蟲莫知於

龍以其不生得也謂之知信乎對曰人實不知非龍

實知注言龍無知乃人不知之耳音義

莫知音智下謂之知實知

注無疏

正義曰人以龍不生得而謂之為知者此是

知同人實不知非是龍實能知言龍可生得非是

不生得也故說古有養龍之事以證龍古者畜龍故

國有豢龍氏有御龍氏注豢御養也音義

豢音患

疏

注正

義曰服虔曰黍養也穀食曰黍御亦養也養馬曰圉
禮養犬豕曰黍知其以穀養蓋龍亦食穀也御與圉
同言養龍猶
養馬故稱御獻子曰是二氏者吾亦聞之而不知其

故是何謂也對曰昔有颺叔安注颺古國也叔安其

君名音義

颺力謬反

有裔子曰董父注裔遠也玄孫之後

為裔音義

裔以制反

實甚好龍能求其耆欲以飲食之龍

多歸之乃擾畜龍以服事帝舜帝賜之姓曰董注擾

順也音義

好呼報反耆時志反飲於鵠反下同食之音嗣下不能食飲食之食同擾而小反

疏

正義曰擾順也順龍之所欲而畜養之

氏曰黍龍注黍龍官名官有

世功則以官氏封諸驩川驩夷氏其後也注驩水上

夷皆董姓音義

驩子

疏

注正義曰鄭語云黎為高辛

工反氏火正命之曰祝融其後八

姓董姓驩夷泰龍則夏滅之矣是也

故帝舜氏世有畜龍及有夏孔甲

擾于有帝注孔甲少康之後九世君也其德能順於

天音義

夏戶雅反下皆同少詩照反下少皞同

疏

注正義曰帝王世紀云少康子帝杼杼子

帝芬芬子帝芒芒子帝世世子帝不降不降弟帝喬喬子帝廣也至帝孔甲孔甲不降子帝賜之

乘龍河漢各二注合為四音義

乘繩證反河漢各二服云河漢各二乘

疏

注正義曰服虔云四頭為乘四乘十六頭也傳言賜之乘龍賜之一乘之龍也即云河漢各二是河

漢共一乘也又云各有雌雄是河漢之
二皆一雌一雄也故杜以為合為四
各有雌雄孔

甲不能食而未獲豢龍氏有陶唐氏既衰其後有劉

累注陶唐堯所治地音義

治道
吏反

學擾龍于豢龍氏以

事孔甲能飲食之夏后嘉之賜氏曰御龍注夏后孔

甲以更豕韋之後注更代也以劉累代彭姓之豕韋

累尋遷魯縣豕韋復國至商而滅累之後世復承其

國為豕韋氏在襄二十四年音義

更音庚注同
復扶又反

疏

注正

義曰傳言以更豕韋之後則豕韋是舊國廢其君以
劉累代之鄭語云祝融之後八姓大彭豕韋為商伯

矣又云彭姓彭祖豕韋則商滅之矣如彼文豕韋之
國至商乃滅於夏王孔甲之時彭姓豕韋未全滅也
又下云劉累懼而遷于魯縣明是累遷之後豕韋復
國至商乃滅耳襄二十四年傳范宣子自言其祖在
豕為御龍氏在商為豕韋氏則劉累子孫復封豕韋
杜跡其事知累之後世更復其國為豕韋氏也舊無
此解杜自為證故云在襄二十四年龍一雌死潛醢以食夏后注潛藏

也藏以為醢明龍不知音義

醢音海
知音智

夏后饗之既而

使求之注求致龍也懼而遷于魯縣注不能致龍故

懼遷魯縣自貶退也魯縣今魯陽也范氏其後也注

晉范氏也獻子曰今何故無之對曰夫物物有其官

官脩其方注方法術朝夕思之一日失職則死及之

注失職有罪音義

朝如字下朝夕見同

失官不食注不食祿官

宿其業注宿猶安也其物乃至注設水官脩則龍至

若泯棄之物乃坻伏注泯滅也坻止也音義

泯彌忍反坻音

旨又丁禮反

鬱湮不育注鬱滯也湮塞也育生也音義

音湮

因疏

正義曰此論致龍之事物謂龍也夫物物各有其官當謂如龍之輩蓋言鳳凰麒麟白虎元龜

之屬每物各有其官主掌之也其人居此官者脩其為官方術從朝至夕終日脩之若一日失其所掌之職令其官方不理則有死罪及之居官者當死矣失其官方則不得食祿得死罪是不食祿也居官者安

其為官之業使職事脩理則其所掌之物乃自生至水官脩則龍至其餘亦當然也若滅棄所掌之事令職事不脩則其物乃止息而潛伏沉滯壅塞不復生育以此故不可生而得也注正義曰夜宿所以安身故云宿猶安也謂安心思其職業服虔云宿思也今日當預思明日之事如家人宿火矣玄卿以服義大迂曲氓滅也坻止也釋詁文也上言官宿其業其物乃至職業不脩則物不至物雖不至尚有物在若滅棄所掌職事不理則其物止而潛伏不復生育乃令無有此物非徒不至而已鬱滯也湮塞也賈逵云然杜用之也鬱積是沈滯之意故為滯也傳謂塞井為堙井是堙為塞也言此物沉滯壅塞不復生也故

有五行之官是謂五官實列受氏姓封為上公注爵

上公疏

正義曰列謂行列言五官皆然也人臣有大功者天子封為國君又賜之以姓諸侯以國

為氏言其得封又得姓兼受之也

祀為貴神社稷五祀是尊是奉注

五官之君長能脩其業者死皆配食於五行之神為

王者所尊奉音義

長丁丈反下文同

疏

注正義曰五官之君長死則皆為貴神王

者社稷五祀則尊奉之如祭配食於五行之神即下重該脩熙稗是也王者祭木火土金水之神而以此人之神配之食非專祭此人也分五行以配四時故五行之神句芒祝融之徒皆以時物之狀而為之名此五者本為五行之神作名耳非與重該之徒為名也晉語云虢公夢在廟有神人面白毛虎爪執錢立西阿公懼而走神曰無走帝命曰使晉襲于爾門公拜稽首覺召史嚭占之對曰如君之言則蓐收也天之刑神也如彼文虢公所夢之狀必非該之貌自是金神之形耳由此言之知句芒祝融玄冥后土之徒

皆是木火水土之神名非所配人之神名也雖本非配人之名而配者與之同食亦得取彼神名以為配者神名猶社本土神之名稷本穀神之名配者亦得稱社稷也此五行之官配食五行之神天子制禮使祀焉是為王者所尊奉也

木正曰句芒注

正官長也取木生句曲

而有芒角也其祀重焉音義

句古侯反注及下皆同重直龍反下文同

疏

注正義曰正訓為長故為官長木官之最長也其火金水土正亦然賈逵云總言萬物句芒非專木生如句杜誤耳木正順春萬物始生句而有芒角杜獨言木者以木為其主故經云木正且木比萬物芒角為甚故舉木而言劉炫以杜不取賈義而獨舉於木而規杜非也

火正曰祝融注祝融

明貌其祀犂焉音義

犂力疏注正義曰杜不辭祝謂祝融二字共為明貌

也賈逵云夏陽氣明朗祝甚也融明也亦以夏氣為之名耳鄭語云黎為高辛氏火正以燁燿敦大光明四海故命之曰祝融如彼文又似由人生名者彼以其官掌夏德又稱之故以夏氣昭明命之耳

金

正曰蓐收

注秋物摧蓐而可收也其祀該焉音義

蓐音

辱本又作辱摧徂回反

水正曰玄冥注水陰而幽冥其祀脩及

熙焉音義

冥亡丁反

土正曰后土注土為羣物主故稱后

也其祀句龍焉在家則祀中雷在野則為社音義

雷力

救疏

注正義曰后者君也羣物皆土所載故土為羣物之主以君言之故云后土也賈逵云句芒祀

於戶祀融祀於竈蓐收祀於門玄冥祀於井后土祀於中雷今杜云在家則祀中雷是同賈說也家謂宮

室之內對野為文故稱家非卿大夫之家也言在野者對家為文雖在庫門之內尚無宮室故稱野且卿大夫以下社在野田故周禮大司徒云辨其邦國都鄙之數制其畿疆而溝封之設其社稷之壇而樹之田主各以其野之所宜木遂以名其社鄭玄云社稷后土及田正之神田主田神后土田正之所依也詩人謂之田祖所宜木謂若松栢栗也是在野則祭為社也此野田之社民所共祭即月令仲春之月擇祭元日命民社是也劉炫云天子以下俱荷地德皆當祭地但名位有高下祭之有等級天子祭地祭大地之神也諸侯不得祭地使之祭社也家又不得祭社使祭中雷也雷亦地神所祭小故變其名賈逵以句芒祀於五云云言雖天子之祭五神亦如此耳社以別祭五行神以五官配之非祀此五神於門戶井竈中雷也門戶井竈直祭門戶等神不祭句芒等也唯有祭后土者亦是土神故特辯之云在家則祀中雷在

野則為社言彼為中雷亦是土神但祭有大小郊特牲云社所以神地之道也地載萬物取財於地教民羨報焉家主中雷而國主社示本也是在龍水物也家則祀中雷也大司徒以下同此禮也

水官棄矣故龍不生得注棄廢也疏

正義曰漢氏先儒說左氏者皆

以為五靈配五方龍屬木鳳屬火麟屬土白虎屬金神龜屬水其五行之次木生火火生土土生金金生水水生木王者脩其母則致其子水官脩則龍至木官脩則鳳至火官脩則麟至土官脩則白虎至金官脩則神龜至故為其說云視明禮脩而麟至思睿信立而白虎擾言從文成而神龜在沼聽聰知正而名川出龍貌共體仁則鳳凰來儀皆脩其母而致其子也解此龍水物者言龍為東方之獸是北方水官之物也水官廢矣故龍不生得言母不脩故子不至也杜氏既無其說未知與舊同否此下不注似與舊說

異或當以為龍是水內生長故為水官之物水官廢矣故龍不生得言水官不脩故無水內之靈獸也若如此解則上文物有其官當謂五靈之物各自有其官官能脩理各自致物龍是水內之物可令水官致龍其鳳凰麟虎之輩共在天地之間不是寢食火木生土出未知何官致鳳何官致虎未測杜旨不可強言是用闕不然周易有之注言若不爾周易無緣疑以俟來哲

有龍在乾

䷀ 注乾下乾上乾音義

乾其連反本亦作乾

之姤

䷋

注巽下乾上姤乾初九變音義

姤古豆反

曰潛龍勿

用注乾初九爻辭音義

交反

其同人

䷌

注離下乾

上同人乾九二變曰見龍在田注乾九二爻辭其大

有䷋注乾下離上大有乾九五變曰飛龍在天注

乾九五爻辭其夬䷪注乾下兌上夬乾上九變音

義夬古快反曰亢龍有悔注乾上九爻辭音義亢告

其坤䷁注坤上坤下坤乾六爻皆變音義坤本又

門反曰見羣龍無首吉注乾用九爻辭坤之剝䷖注

坤下艮上剝坤上六變音義剝邦角反曰龍戰于野

注坤上六爻辭疏正義曰傳例上下雖不用筮但指

更別為卦即云此卦之某卦則此乾之姤宣十二年
師之臨是也劉炫云杜以之為適炫謂易之爻變則

成一卦遂以彼卦名爻乾之初九姤卦爻九二同人卦爻九五大有卦爻上九夬卦爻用九全變則成坤卦故謂用九為坤蔡墨此意取易文耳非揲蓍求卦安有之適之義若以之為之適則其非之適之意何以言其同人其大有此本當言初九九二但以爻變成卦即以彼卦名爻其意不取於之適所言其同人其大有猶引詩言其二章其三章先引初九故言乾卦之姤爻初九言乾以下不復須云乾故言其同人其大有就乾卦而其之其此同人爻其此大有爻以下文勢悉皆若是也異下乾上姤乾之初九爻變而下成姤卦也其象曰姤遇也柔遇剛也乾為天為剛巽為風為柔風行必有所遇猶女行而遇男故名此卦為姤也蔡墨此言取易有龍字而已無取於易之義理故杜注唯指其辭之所在不解其辭之意其說易者自具於此不復煩言也離下乾上同人乾之九二爻變而成同人之卦也其象曰天與火同人天體在

上火性炎上同于天也猶君設政教而臣民從之和
同之義故名此卦為同人也服虔云天在上火炎上
同于天天不可同故曰同人乾下離上大有乾之九
五爻變而成大有之卦也其彖曰大有柔得尊位大
中而上下應之曰大有柔得尊位謂六五也五位尊
而柔居之處尊以柔居中以大體無二陰以分其應
上下應之無所不納大有之義故名此卦為大有乾
下兌上夬乾之上九爻變而成夬卦也其彖曰夬決
也剛決柔也此卦五陽而決一陰乾為天為剛為健
兌為澤為柔為說以剛正決柔邪故名此卦為夬乾
之六爻皆陽坤之六爻皆陰以二卦其爻既純故別
總其用而為之辭故乾有用九坤有用六餘卦其爻
不純無總用也六爻皆變乃得總用乾之六爻皆變
則成坤卦故謂用九之辭為其坤也六爻既變而不
用卦下之辭者周易用變卦下之辭非變又無龍文
史墨指說於龍故以用為語坤下艮上剝坤之上六

爻變而成剝卦也其象曰剝剝也柔變剛也剝卦五陰而一陽陰漸長而滅陽猶邪長而剝損正道故名此卦為剝也 若不朝夕見誰能物之注物謂上六卦之所

稱龍各不同也今說易者皆以龍喻陽氣如史墨之

言則為皆是真龍疏

正義曰蔡墨言古者龍可生得人皆見之故周易之辭以龍為

喻若使龍不朝夕出見誰能知其動靜而得以物名之易言潛龍飛龍及龍戰之等明是見其飛潛見其戰鬪而得以物名之是知龍可生得古人見龍形也 獻子曰社稷五祀誰氏之

五官也注問五官之長皆是誰對曰少皞氏有四叔

注少皞金天氏音義

皞戶疏正義曰少皞氏有四叔老反四叔是少皞之子孫非

一時也未知於少皞遠近也四叔出於少皞耳其使
重為句芒非少皞使之世族譜云少皞氏其官以鳥
為名然則此五官皆在高陽之世也楚語云少皞氏
之衰也九黎亂德民神雜糅不可方物顓頊受之乃
命南正重司天以屬神命火正黎司地以屬民是則
重黎居官在高陽之世也又鄭語云黎為高辛氏火
正命之曰祝融則黎為祝融又在高辛氏之世案世
本及楚世家云高陽生稱稱生卷章卷章生黎如彼
文黎是顓頊之曾孫也楚語云少皞之衰顓頊受之
即命重黎似是即位之初不應即得命會孫為火正
也少皞世代不知長短顓頊初已命黎至高辛又加
命不應一人之身縣歷兩代事既久遠書復散亡如
此參差難可考校世家云共工作亂帝嚳使黎誅之
而不盡帝誅黎而以其弟吳回為黎復居火正為祝
融即如此言黎或是國名官號不是人之名字顓頊
命黎高辛命黎未必共是一人傳言世不失職二者

或是父子或是祖孫其事不可知也由此言之少皞
四叔未必不有在高辛世著也此五祀者居官有功
以功見祀不是一時之人脩熙相代為水正即非一
時也且傳言世不失職便是積世能官其功益大非
是暫時有功遂得萬世承祀明是歷選上代取其
最有功者使之配食亦不知初以此人配食何代聖
王為之蓋在高辛唐虞之世耳
曰重曰該曰脩曰熙實能金木及水

注能治其官音義

重直龍反
該古咳反

使重為句芒注木正該

為蓐收注金正脩及熙為玄冥注二子相代為水正

世不失職遂濟窮桑此其三祀也注窮桑少皞之號

也四子能治其官使不失職濟成少皞之功死皆為

民所祀窮桑地在魯北

疏注正義曰窮桑少皞之號帝王世紀亦然賈逵云處

窮桑以登為帝故天下號之曰窮桑帝賈以濟為度也言四叔子孫世不失職遂渡少皞之世杜以少皞之世以鳥名官不得有木正火正故以濟為成四子能治其官使不失職濟成少皞之功言少皞有王功子孫能成之故死皆為民所祀也少皞居窮桑定四年傳稱封伯禽於少皞之墟故云窮桑地在魯北土地名窮桑闕言在魯北相傳云耳

顓頊氏有子曰犂為祝融注犂為

火正音義

顓音專頊許玉反

共工氏有子曰句龍為后土注

共工在太皞後神農前以水名官其子句龍能平水

土故死而見祀音義

共音恭

疏

注正義曰十七年傳鄭子言前世名官從下而

上先言炎帝以火名次言共工以水名次言太皞以龍名是共工在太皞後神農前以水名官者也祭法曰共工氏之霸九州也其子曰后土能平九州故祀以為社能平九州是能平水土也言共工有子謂後世子耳亦不知句龍之為后土在於何代此其二祀少皞氏既以鳥名官此當在顓頊以來耳

也后土為社注方答社稷故明言為社疏

注正義曰獻子問社

稷五祀既答五祀當更答社稷但句龍既為后土又亦配社蔡墨既答五祀方答社稷故明言后土為社也
稷田正也注掌播殖也疏

正義曰月令云孟春行冬令則首種不入鄭玄

云首種謂稷也周語云宣王不籍千畝號文公諫曰民之大事在農是故稷為大官然則百穀稷為其長遂以稷名為農官之長有烈山氏之子曰柱為稷注正長也稷是田官之長

列山氏神農世諸侯音義

列如字禮記作厲山

疏

正義曰魯語及祭法皆云

列山氏之有天下也其子能殖百穀故祀以為稷言有天下則是天子矣杜注不得為諸侯也賈逵鄭玄皆云列山炎帝之號杜言神農世諸侯者案帝王世紀神農本起列山然則初封列山為諸侯後為天子猶帝堯初為唐侯然也若然列山即神農而云神農世為諸侯者案世紀神農為君總有八世至榆罔而滅亦稱神農氏是總號神農也故列山氏得於神農之世為諸侯後為農神也劉炫以為列山氏即神農非諸侯而規杜非也此及魯語皆云其子曰柱祭法曰農者劉炫云蓋柱人名其官曰農猶呼周棄為稷

自夏以上祀之注祀柱音義

上總掌反

周棄亦為稷自商

以來祀之注棄周之始祖能播百穀湯既勝夏廢柱

而以棄代之傳言蔡墨之博物疏

注正義曰棄為周之始祖能播殖百

穀經傳備有其事以其後世有天下號國曰周故以周冠棄棄時未稱周也書序云湯既勝夏欲遷其社不可作夏社孔安國云湯承堯舜禪代之後順天應人逆取順守而有慙德故革命創制改正易服變置社稷而後世無及句龍者故不可而止是言成湯變置社稷之由也湯於帝世年代猶近功之多少傳習可知故得量其優劣改易祀典意欲遷社而無及句龍棄功乃過於柱廢柱以棄為稷也其五祀之神重卑之輩若更有賢能亦應遷徙但其功莫之能先帝王不敢改易故得永流萬代常在祀典良由後世之意謙故也

○冬晉趙鞅荀寅帥師城汝濱注趙鞅

趙武孫也荀寅中行荀吳之子汝濱晉所取陸渾地

音義

濱音賓行
戶即反

遂賦晉國一鼓鐵以鑄刑鼎注令晉

國各出功力共鼓石為鐵計令一鼓而足因軍役而

為之故言遂音義

鑄之樹反
令力呈反

疏

正義曰服虔云鼓
量名也曲禮曰獻米

者操量鼓取晉國一鼓鐵以鑄之但禮之將命置重
而執輕鼓可操之以將命即且區之類非大器也唯
用一鼓則不足以成鼎家賦一鼓而鐵又太多且金
鑄之物當稱之以權衡數之以鈞石寧用量米之器
量之哉故杜以為賦晉國者令民各出功力均賦取
其功也冶石為鐵用橐扇火動橐謂之鼓今時俗語
猶然令衆人鼓石為鐵計令一鼓使足故云賦晉國
一鼓鐵也遂者因上生下之辭因城汝濱遂鑄刑鼎
遂也

故言

著范宣子所為刑書焉疏

正義曰范宣子制
刑書施於晉國自使

朝廷承用未嘗宣示下民今荀寅謂此等宣子之書可以長為國法故鑄鼎而銘之以示百姓猶如鄭鑄刑鼎仲尼譏之其意亦與叔向譏子產同仲尼曰晉其亡乎失其度矣夫

晉國將守唐叔之所受法度以經緯其民卿大夫以

序守之注序位次也民是以能尊其貴貴是以能守

其業貴賤不愆所謂度也疏

正義曰守其舊法民不豫知臨時制宜輕重難

測民是以能尊其貴畏其威刑也官有正法民常畏威貴是以能守其業保祿位也貴者執其權柄賤者畏其威嚴貴賤尊卑不愆此乃所謂度也言所謂法度正如此是也文公是以作執秩

之官為被廬之法注僖二十七年文公蒐被廬脩唐

叔之法音義

被皮義反廬力居反
蒐本又作搜所求反

以為盟主今棄是

度也而為刑鼎民在鼎矣何以尊貴注棄禮徵書故

不尊貴貴何業之守注民不奉上則上失業貴賤無

序何以為國疏

正義曰今棄是貴賤常度而為刑書之鼎民知罪之輕重在於鼎矣貴者

斷獄不敢加增犯罪者取驗於書更復何以尊貴威權在鼎民不忌上貴復何業之守貴之所以為貴只為權勢在焉勢不足畏故業無可守貴無可守則賤不畏威貴賤既無次序何以得成為國且夫

宣子之刑夷之蒐也晉國之亂制也注范宣子所用

刑乃夷蒐之法也夷蒐在文六年一蒐而三易中軍

帥賈季箕鄭之徒遂作亂故曰亂制音義

帥所類反

疏

注正

義曰於時晉侯將以士穀梁益耳將中軍先克曰狐趙之勳不可廢也以狐射姑將中軍趙盾佐之陽處父政蒐于董更以趙盾將中軍狐射姑佐之是一蒐而三易中軍帥三易者士穀梁益耳將中軍是易代前人是一易也狐射姑將中軍是二易也又趙盾將中軍是三易也致使賈季箕鄭之徒怨恨而作亂其事文公傳具矣因此蒐而

有此亂故曰晉國之亂制若之何以為法蔡史墨曰

范氏中行氏其亡乎注蔡史墨即蔡墨中行寅為下

卿而干上令擅作刑器以為國法是法姦也又加范

氏焉易之亡也注范宣子刑書中既廢矣今復興之

是成其咎音義

攢市賊反復扶又反咎其久反

疏

正義曰宣子刑書久已廢矣今從變

易興之以成其滅亡也劉炫云范氏取蒐之法以為國制雖則為非書已廢矣縱應有禍亡釁已歇今荀寅更述其事又加增范氏之惡焉范氏已欲免禍今復改易之而使亡

其及趙氏趙孟

與焉然不得已若德可以免注鑄刑鼎本非趙鞅意

不得已而從之若能脩德可以免禍為定十三年荀

寅士吉射入朝歌以叛音義

與音預朝如字

經三十年春王正月公在乾侯注釋不朝正于廟

夏六月庚辰晉侯去疾卒注未同盟而赴以名音義

去起

呂反

秋八月葬晉頃公注三月而葬速音義

頃音

疏

正義曰
諡法慈

仁和民
曰頃

冬十有二月吳滅徐徐子章羽奔楚注徐子稱名以名告也

傳三十年春王正月公在乾侯不先書鄆與乾侯非公且徵過也注徵明也二十七年二十八年公在鄆二十九年公在乾侯而經不釋朝正之禮者所以非

責公之妄且明過謬猶可掩故不顯書其所在使若
在國然自是鄆人潰叛齊晉卑公子家忠謀終不能

用內外棄之非復過誤所當掩塞故每歲書公所在

音義

徵直升反或本作
懲誤復扶又反

疏

正義曰經書公在乾侯者
季氏以此告廟釋公不得

朝正故國史書之于策也釋例曰昭公之孫每正月
必書者以孫告廟也公二十五年始出居鄆及乾侯
累歲居外而仲尼不書于經故傳曰不先書鄆與乾
侯非公且徵過也既以非責公之妄且明過謬之可
掩故不顯書其在外使若國然也自三十年至於
終沒則皆顯書其所在之地傳皆隨年而互言其事
明罪之在公非復過謬也三代封建自上及下降殺
以兩君不亢高臣不極卑彊弱相參衆力相須賢愚

相劇故雖有昏亂之君亦有忠賢之輔我周東遷晉鄭是依無知之亂實獲小白驪姬之妖重耳以興天下雖瓦解而不土崩海內雖鼎沸而不益溢天生季氏以貳魯侯季氏未有篡奪之惡公雖失志亦無抽筋倒懸之急聽用隸豎僥倖之私既不能強又不能弱所以身死於外見貶於春秋也是言罪在公書公在之意也杜言見貶於春秋者公當在國治民每歲書公在外是其貶責公也劉炫云序云諸言不書皆仲尼新意然則前三年魯史皆書公在仲尼去之仲尼所以不於此先書公在鄆與乾侯者所以非公之妄妄伐季氏且明過謬猶可掩此年書者自是鄆人潰叛云云此年云非公且徵過三十一年云言不能外內三十二年云言不能外內又不能用其人每歲發傳言公之罪也注不先書鄆與乾侯一事之中有兩種之意一者非責公之妄一者明公過謬猶可掩也非責公之妄者以君舉必書公在乾侯與鄆臣子

當委曲詳錄今輕略不記似若不足可錄然所以非責公之妄也明公過謬猶可掩者被臣所逐出居於外若顯然書之則恥惡尤甚故隱而不書猶若國欲明公過謬之失尚可容掩也此以徵為明明公過可掩也襄二十八年傳云王人來告喪問崩日以甲寅告故書之以徵過徵亦為明明告喪者之過也彼言徵審也審其事知無他故以明其過失也服虔云非公且徵過昭公無道久在外季氏非公不肯釋言公在某地春秋之義亦以不書徵季氏之過此年書者公不得入晉外內有困辱季氏閔而釋之所謂事君如在國案明年傳云言不能外內又明年傳云言不能外內又不能用其人皆是傳說經意非責昭公不是季氏非公也即如服言往前季氏非公不肯釋公所在此年以後方始閔而釋之所謂事君如在國則往年未釋之時不如在國矣二十七年虜之會范獻子何以已言季氏事君如在國也季氏奪公鄆邑

與公交戰行貨齊晉使不納公禱于煬宮求君不入
及其死也猶欲絕其兆域加之惡諡閔公之事復安

乎在 ○夏六月晉頃公卒秋八月葬鄭游吉弔且送葬

魏獻子使士景伯詰之曰悼公之喪子西弔子蟯送

葬注在襄十五年音義

詰起吉反蟯居表反

今吾子無貳何故

注弔喪共使音義

使所更反

對曰諸侯所以歸晉君禮也

禮也者小事大大字小之謂事大在共其時命注隨

時共所求音義

共音恭注及下同

字小在恤其所無以敝邑

居大國之間共其職貢與其備御不虞之患豈忘共

命注言不敢忘共命以所備御者多不及辨之音義

御魚呂反注
同辨皮莧反

先王之制諸侯之喪士弔大夫送葬唯

嘉好聘享三軍之事於是乎使卿晉之喪事敝邑之

間先君有所助執紼矣注紼輓索也禮送葬必執紼

音義

好呼報反間音闕下同紼音弗
輓本又作晚音晚索悉各反

疏

注正義曰紼
禮或作紼禮

記緇衣云王言如絲其出如綸王言如綸其出如紼
紼是大繩也周禮天子葬用六紼喪大記君葬用四
紼大夫葬用二紼紼為葬之所用是輓索也案禮雜
記諸侯執紼五百人大夫三百人鄭玄云天子蓋千
人也天子諸侯之喪殯於西序而屬紼焉備火災而
輓之也王制云喪三年不祭唯祭天地社稷為越紼

而行事謂喪在殯踰紼而行祭也周禮大司徒云大喪帥六卿之衆庶屬其六引又遂人云大喪帥六遂之役屬六綽鄭玄喪大記注云在棺曰綽行道曰引至殯將窆又曰綽是綽引一物從所在而異名耳禮送喪必執紼曲禮文也鄭玄云葬喪之大事紼引車索也鄭之先君親送皆侯葬者傳無其文游吉今言之蓋亦嘗有矣

若其不間雖士大夫有所不獲數矣注不得如先王禮數大國之惠亦慶其加注慶善也謂善其

君自行而不討其乏明底其情注底致也音義

底音旨

取備而已以為禮也疏

正義曰善其有加不討其乏明知鄭國致其情實取充備

而已靈王之喪注在襄二十九年我先君簡公在楚我

先大夫印段實往敝邑之少卿也注少年少也音義

印一勿反少疏正義曰由簡公在楚上卿守國故少卿行耳鄭玄以為簡公若在君當自

行其言非傳旨也王吏不討恤所無也今大夫曰女盍從舊

注盍何不也音義女音汝盍胡臘反下同舊有豐有省不知所

從從其豐則寡君幼弱是以不共從其省則吉在此

矣唯大夫圖之晉人不能詰注傳言大叔之敏音義

省所景反下同○吳子使徐人執掩餘使鍾吾人執燭庸注

二十七年奔故二公子奔楚楚子大封而定其徙注

大封與土田定其所徙之居使監馬尹大心逆吳公

子使居養注二子奔楚楚使逆之於竟也養卽所封

之邑音義

監古衛反竟音境

莠尹然左司馬沈尹戍城之注

城養音義

莠音誘

取於城父與胡田以與之注胡田故

胡子之地將以害吳也子西諫曰吳光新得國而親

其民視民如子辛苦同之將用之也若好吳邊疆使

柔服焉猶懼其至注柔服謂不與吳構怨音義

若好呼報

反吳一本作吾疆居良反

吾又彊其讎以重怒之無乃不可乎注

雖謂二公子音義

重直用反

吳周之胄裔也而棄在海濱

不與姬通今而始大比于諸華光又甚文將自同於

先王注先王謂大王王季亦自西戎始比諸華音義

胄直又反
大王音恭

不知天將以為虐乎使翦喪吳國而封大

異姓乎其抑亦將卒以祚吳乎其終不遠矣注言其

事行可知不久音義

喪息浪反
祚字故反

我盍姑億吾鬼神注

億安也音義

億於力反

而寧吾族姓以待其歸注善惡之

歸將焉用自播揚焉注播揚猶勞動也音義

焉於虔反
播彼

我反又波
賀反注同

王弗聽吳子怒冬十二月吳子執鍾吾子

遂伐徐防山以水之注防壅山水以灌徐音義

壅於勇反

灌古
亂反

已卯滅徐徐子章禹斷其髮注

斷髮自刑示懼

音義

斷丁管
反注同

攜其夫人以逆吳子吳子唁而送之使

其邇臣從之遂奔楚注邇近也楚沈尹戌帥師救徐

弗及遂城夷使徐子處之注夷城父也○吳子問於

伍員曰初而言伐楚注在二十年音義

員音云

余知其

可也而恐其使余往也又惡人之有余之功也今余

將自有之矣伐楚何如對曰楚執政衆而乖莫適任

患若為三師以肄焉注肄猶勞也音義

惡烏路反適丁歷反任音

壬肄本又作肆以制反下同

一師至彼必皆出彼出則歸彼歸則

出楚必道敝注罷敝於道音義

罷音皮下文同

亟肄以罷之

注亟數也音義

亟欺冀反數所角反

多方以誤之既罷而後以

三軍繼之必大克之闔廬從之楚於是乎始病注為

定四年吳入楚傳

經三十有一年春王正月公在乾侯

季孫意如會晉荀躒于適歷注適歷晉地音義

躒力狄反適丁

反歷

夏四月丁巳薛伯穀卒注襄二十五年盟重丘音義

重

龍疏

注正義曰傳言同盟故書此穀與魯必嘗同盟矣薛於重丘以前雖數與魯盟薛伯入春秋以來卒

非不見經傳未知此穀以何年卽位故舉去今近者言之

晉侯使荀躒唁公于乾侯注將使意如迎公故荀躒來

唁

秋葬薛獻公注無傳

冬黑肱以濫來奔注黑肱邾大夫濫東海昌慮縣不書

邾史闕文音義

濫力甘反或力楚反慮音問又如字疏注正義曰公羊穀

而傳解其無邾之意言邾人以濫封此黑肱使為別國故不繫於邾以非天子所封故無子男爵號其言不可通於左氏左氏無傳明是闕文二傳見其文闕而妄為說耳

十有二月辛亥朔日有食之

傳三十一年春王正月公在乾侯言不能外內也注

公內不容於臣子外不容於齊晉所以久在乾侯○

晉侯將以師納公范獻子曰若召季孫而不來則信

不臣矣然後伐之若何晉人召季孫獻子使私焉曰

子必來我受其無咎注言我為子受無咎之任音義

咎其九反下注疏正義曰言我為子受其重任其
放此為于偽反疏使子必無咎受其貨故保任之季

孫意如會晉荀躒于適歷荀躒曰寡君使躒謂吾子

何故出君有君不事周有常刑子其圖之季孫練冠

麻衣跣行注示憂感音義

出如字又勅律反跣素典反

疏

正義曰練冠蓋

如喪服斬衰既練之後布冠也麻衣當是布深衣也
問喪云親始死徒跣跣行不屨以其不得事君示已

憂戚之深也

伏而對曰事君臣之所不得也敢逃刑命注

言願事君君不肯還不敢辟罪君若以臣為有罪請

囚于費以待君之察也亦唯君若以先臣之故不絕

季氏而賜之死注雖賜以死不絕其後音義
費音疏

正義曰此季孫探言罪已之意不絕季氏之祀或更立其子弟直賜其身死而已服虔云言賜不使死是

為以死賜之若賜死即是不殺下句何須更言弗殺弗亡若弗殺弗亡君之惠也

死且不朽若得從君而歸則固臣之願也敢有異心

注君皆謂魯侯也蓋季孫探言罪已輕重以答荀躒

音義探他夏四月季孫從知伯如乾侯注知伯荀躒

音義

知音智

子家子曰君與之歸一慙之不忍而終身

慙乎公曰諾衆曰在一言矣君必逐之注言晉既憂

君君一言使晉晉必逐之荀躒以晉侯之命唁公且

曰寡君使躒以君命討於意如意如不敢逃死君其

入也公曰君惠顧先君之好施及亡人將使歸糞除

宗祧以事君則不能見夫人已所能見夫人者有如

河注夫人謂季孫也言若見季孫已當受禍明如河

以自誓音義

好呼報反施以鼓反祧他彫反夫音扶下及注同

荀躒掩耳而

走注怪公所言示不忍聽曰寡君其罪之恐敢與知

魯國之難注言恐獲不納君之罪今納而不入何敢

復知即音義

與音預難乃且反復扶又反

臣請復於寡君退而謂

季孫君怒未怠子姑歸祭注歸攝君事子家子曰君

以一乘入于魯師季孫必與君歸公欲從之衆從者

脅公不得歸注傳言君弱不得復自在音義

乘繩證反衆從

才用反

○薛伯穀卒同盟故書注謂書名也入春秋來

薛始書名故發傳經在荀躒言公上傳在下者欲魯

事相次○秋吳人侵楚伐夷侵潛六注皆楚邑楚沈
尹戌帥師救潛吳師還楚師遷潛於南岡而還吳師
圍弦左司馬戌右司馬稽帥師救弦及豫章注左司

馬沈尹戌音義

稽音啓又古今反

吳師還始用子胥之謀也

注謀在前年○冬邾黑肱以濫來奔賤而書名重地
故也注黑肱非命卿故曰賤君子曰名之不可不慎
也如是注是黑肱也夫有所有名而不如其已注有
所謂有地也言雖有名不如無名已止也以地叛雖

賤必書地以名其人終為不義弗可滅已是故君子

動則思禮行則思義不為利回注回正心也音義

為不

于偽反下
不為同

不為義疚注疚病也見義則為之音義

疚久

又反

或求名而不得或欲蓋而名章懲不義也齊豹為

衛司寇守嗣大夫注守先人嗣言其尊音義

懲直升
反下同

作而不義其書為盜注求名而不得也二十年豹殺

衛侯兄欲求不畏疆禦之名邾庶其注在襄二十二

年莒牟夷注在五年邾黑肱以土地出求食而已不

求其名賤而必書注春秋叛者多唯取三人來適魯

者三人皆小國大夫故曰賤此二物者所以懲肆而

去貪也注物事也肆放也齊豹書盜懲肆也三叛人

名去貪也音義

去起呂反

若艱難其身注身為艱難以險

危大人注

大人在位者而有名章徹注謂得勇名攻

難之士將奔走之注攻猶作也奔走猶赴趣也音義

難乃旦反

若竊邑叛君以徼大利而無名注謂不書其人

名音義

徼古堯反

貪冒之民將寘力焉注盡力為之不顧

於見書音義

冒亡北反又亡報反寘之豉反

是以春秋書齊豹曰盜

三叛人名以懲不義數惡無禮其善志也注無禮惡

逆皆數而不忘記事之善者也音義

數所主反注同

故曰春

秋之稱微而顯注文微而義著音義

稱尺證反

婉而辨注

辭婉而旨別音義

婉於阮反別彼列反

疏

正義曰此婉而辨則與微而顯其意一也

故杜云辭婉而旨別辭婉則文微也旨別則義顯也上句微而顯者據文雖微隱而義理顯著下句婉而

辨者辭雖婉順相似而旨意有殊故重起其文也此與成十四年婉而成章其事異也彼謂諱君惡與此

不同

上之人能使昭明注上之人謂在位者在位者

能行其法非賤人所能善人勸焉淫人懼焉是以君

子貴之○十二月辛亥朔日有食之是夜也趙簡子

夢童子羸而轉以歌注轉婉轉也音義

羸本又作裸力果反

旦

占諸史墨曰吾夢如是今而日食何也注簡子夢適

與日食會謂咎在已故問之對曰六年及此月也吳

其入郢乎終亦弗克注史墨知夢非日食之應故釋

日食之咎而不釋其夢音義

郢以井反又羊政反應應對之應

入郢

必以庚辰注庚日有變日在辰尾故曰以庚辰定四

年十一月庚辰吳入郢疏

注正義曰於天文房心尾為大辰尾是辰後之星也

日在辰尾自謂在辰星庚辰入郢乃謂日是辰日二辰不同而以日在辰尾配庚為庚辰者二辰實雖不同而同名曰辰以其名同故取以為占此則史墨能知非是人情所測定四年十一月庚辰吳入郢是其言之驗也此十二月日食彼十一月入郢則是未獲其月而云及此月者長厯定四年閏十月庚辰吳入郢是十一月二十九日杜云昭二十一年傳曰六年十二月庚辰吳入郢今十一月者并閏數也然則彼是新閏之後且十一月二十九日又其月垂盡故得為及此月也

日月在辰尾注辰

尾龍尾也周十二月今之十月日月合朔於辰尾而

食疏

注正義曰東方七宿角亢氐房心尾箕共為蒼龍之體南首北尾角卽龍角尾卽龍尾釋天云

大辰房心尾也是房心與尾共為大辰故言辰星龍尾也周十二月今之十月月令孟冬之月日在尾是此時日月合朔於辰尾而日食也

庚午之日日始有謫火勝金故弗

克注謫變氣也庚午十月十九日去辛亥朔四十一

日雖食在辛亥更以始變為占也午南方楚之位也

午火庚金也日以庚午有變故災在楚楚之仇敵唯

吳故知入郢必吳火勝金者金為火妃食在辛亥亥

水也水數六故六年也音義

謫遺革反

疏

注正義曰昏義云陽事不得適

見於天日為之食謫譴責也人有咎責氣見於天故謫為變氣也長歷此年十月壬子朔故庚午是十月

十九日也從庚午下去十二月辛亥朔為四十一日
雖食在辛亥之日而更以庚午為占舍近而取遠自
是史墨所見其意不可知也午為南方之辰楚是南
方之國故午為楚之位也午是南方之辰火也庚是
西方之日金也日以庚午有變午在南方必南方之
國當其咎故災在楚楚之仇敵唯有吳耳故知入郢
必是吳也其日庚午庚金午火五行相尅火勝金金
以畏火之故金為火妃夫妻相得而彊是楚彊盛之
兆雖被吳入必不亡國故知吳入郢終亦弗克言其
不能滅楚也食在辛亥之日亥在北方水位也北方
水數六故曰六年吳入郢也

經三十有二年春王正月公在乾侯取闕注無傳公別

居乾侯遣人誘闕而取之不用師徒音義

闕口正義
暫反疏曰公

羊傳曰闕者何邾婁之邑也案傳定元年將葬昭公季孫使役如闕公氏將溝焉則闕是魯公葬地非是邾邑公羊不可通於左氏也土地名東平須昌縣東南有闕城是也賈逵云昭公得闕季氏奪之不因師徒謂此取闕為季氏取於公也案檢經傳公自出奔以來唯齊侯取鄆以居公耳未有公取闕之處安得取於公也且若是季氏奪公無由得告廟書經故杜以為公取之也四年傳例曰凡克邑不用師徒曰取知公遣人誘而取之不用師徒也

夏吳伐越

秋七月

冬仲孫何忌會晉韓不信齊高張宋仲幾衛世叔申鄭

國參曹人莒人薛人杞人小邾人城成周注世叔申世

叔儀孫也國參子產之子不書盟時公在外未及告公

公已薨音義

參七南反

疏

注正義曰傳稱晉魏舒合諸侯之大夫于狄泉尋盟令城成周則此

時為盟矣而不書盟者賈逵云魯有昭公難故會而不盟案傳文無魯人辭盟之事其城成周又魯人共城之矣何以言會而不盟也若以難辭當辭不會身既在會何敢辭豈以昭公在外而欲背盟乎故杜以為不書盟者時公在外未及告公而公已薨既不得告公故不書於經也案傳尋盟令城成周則盟在城前猶得書城而盟不書者晉合諸侯大夫本以城事召之孟懿子將從晉命即以告公雖會還乃書而已告公訖故得書之其尋盟之事晉不預令諸侯大夫既集晉始發意尋盟之事未嘗告公故行還不得書也此云城成周者實未城

也晉人始計功庸賦文數以令諸侯耳明年傳稱正月庚寅裁三旬而畢是明年始城也此未城而已書城知本以城事召集因集而書城耳

十有二月己未公薨于乾侯注十五日疏

注正義曰傳言十一月令

城成周雖無某日明年乃始城之當在月之將末杜顯言此十五日者言盟去公薨日近以明未及告意也

傳三十二年春王正月公在乾侯言不能外內又不

能用其人也注其人謂子家羈也言公不能用其人

故於今猶在乾侯○夏吳伐越始用師於越也注自

此之前雖疆事小爭未嘗用大兵音義

疆居良反爭爭鬪之爭

史墨曰不及四十年越其有吳乎注存亡之數不過

三紀歲星三周三十六歲故曰不及四十年哀二十

二年越滅吳至此三十八歲越得歲而吳伐之必受

其凶注此年歲在星紀星紀吳越之分也歲星所在

其國有福吳先用兵故反受其殃音義分扶問反疏

注正義曰十一年傳稱楚弘對景王云歲在豕韋言
十一年歲星在豕韋也又曰歲在大梁蔡復楚凶謂

十三年歲星在大梁也十三年距此十九年耳歲星
歲行一次十二年而行天一周則二十五年復在大
梁從彼而厯數之則此年始至析木之津而此年數
在星紀者歲行一次舉大數耳其實一歲之行有餘

一次故劉歆三統之術以為歲星一百四十四年行
天一百四十五次計一千七百二十八為歲星歲
數言數滿此年剩得行天一周三統之歷以庚戌為
上元從上元至襄二十八年積十四萬二千六百八
十六歲置此歲數以歲星歲數一千七百二十八除
之得積終八十二去之歲餘九百九十以一百四十
五乘歲餘得十四萬三千五百五十一以一百四十四
除之得九百九十六為積次不盡一百二十六為次
餘從襄二十八年至昭十五年合有一十八年歲星
年行一次年有一餘以次加次得一千一十四以餘
加餘得一百四十四餘數滿法又成一次以從積次
得一千一十五也以十二去之餘餘次一百四十四
周七個一百四十四年還得剩行天一周也餘七命
起星紀算外得鷄火是昭十五年歲星在鷄火也計
十三年在大梁十五年當在鷄首而在鷄火者由其
餘分數滿剩得一次猶如閏餘滿而成月也以十五

年歲在鶉火歷而數之則二十七年復在鶉火故此
年在星紀也於十二次分野星紀是吳越之分也歲
星是天之貴神所在之次其國有福今越得歲星故
吳伐之則凶也吳越同分而云越福吳凶者以吳先
用兵故反受其殃賈逵云然杜從之也鄭玄云天文
分野斗主吳牽牛主越此是歲星在牽牛故吳伐之
凶案史傳所云吳越同分不言於次之內更候分星
姜氏任氏共守玄枵從以何星主齊何星主薛也且
據三統之術星紀之初斗十二度至於牽牛初度乃
為牛耳十五年餘分始滿則此年之初歲星初入此
次伐越在夏未得已至牽牛
牛鄭之此說為妄之甚也

○秋八月王使富辛與石

張如晉請城成周注子朝之亂其餘黨多在王城敬

王畏之徙都成周成周狹小故詩城之音義
狹音洽天

子曰天降禍于周俾我兄弟竝有亂心以為伯父憂

注俾使也兄弟謂子朝也伯父謂晉侯音義

俾本又作果同

必爾反

注同 我一二親昵甥舅不皇啓處於今十年注謂

二十三年二師圍郊至于今音義

昵女乙反

勤戍五年注

謂二十八年晉簪秦致諸侯之戍至于今疏

注正義曰案二

十七年十二月晉簪秦致諸侯之戍于周而此杜云二十八年者以十二月垂盡去在十二月至周則在

二十八年故云五年也

余一人無日忘之注念諸侯勞閔閔焉

如農夫之望歲懼以待時注閔閔憂貌王憂亂常閔

閔冀望安定如農夫之憂飢冀望來歲之將熟伯父

若肆大惠復二文之業弛周室之憂注肆展放也二

文謂文侯仇文公重耳弛猶解也音義

弛武氏反注同重直龍反

徼文武之福以固盟主宣昭令名則余一人有大願矣昔成王合諸侯城成周以為東都崇文德焉注作

成周遷殷民以為京師之東都所以崇文王之德音

義

徼古堯反下同

疏

注正義曰杜知作成周為崇文王之德者以上傳云徼文武之福即云成王合

諸侯城成周以崇文德故以為崇文王之德劉炫以為崇文王之教而規杜非也

今我欲徼

福假靈于成王脩成周之城俾戍人無勤諸侯用寧

蝥賊遠屏晉之力也注蝥賊喻災害音義

蝥亡注
疏正

義曰蝥賊食苗之蟲釋蟲云食根
蝥食節賊故以蝥賊喻災害也

其委諸伯父使伯

父實重圖之俾我一人無徵怨于百姓注徵召也音

義

徵張
升反

而伯父有榮施先王庸之注庸功也先王之

靈以為大功音義

施式
政反

范獻子謂魏獻子曰與其戍

周不如城之天子實云注云欲罷戍而城雖有後事

晉勿與知可也從王命以紓諸侯晉國無憂是之不

務而又焉從事魏獻子曰善使伯音對注伯音韓不

信音義

勿與音預舒馬於虔反

曰天子有命敢不奉承以奔

告於諸侯遲速衰序注衰差也序次也音義

衰初危反注同

於是焉在注在周所命○冬十一月晉魏舒韓不信

如京師合諸侯之大夫于狄泉尋盟且令城成周注

尋平丘盟魏子南面注居君位衛彪僖曰魏子必有

大咎干位以令大事非其任也注彪僖衛大夫音義

彪彼蚪反僖音兮咎其久反

詩曰敬天之怒不敢戲豫敬天之渝

不敢馳驅注詩大雅戒王者言當敬畏天之譴怒不

可遊戲逸豫馳驅自恣渝變也音義渝羊朱反疏譴棄戰反注

義曰此詩大雅板之篇刺厲王之詩也詩注以天謂厲王此據上天斷章取意況敢干位以

作大事乎已丑士彌牟營成周計丈數注計所當城

之丈數也疏注正義曰謂周迴遠近之丈數也揣高

卑注度高曰揣音義揣丁果反又初委反度度厚薄

伋溝洫注度深曰伋音義伋本又作伋而物土方議

遠邇注物相也相取土之方面遠近之宜音義相息亮反

同下
量事期注知事幾時畢音義幾居豈反計徒庸注

知用幾人功慮財用注知費幾財用音義貴反書餽

糧注知用幾糧食音義餽音侯本亦以令役於諸侯

屬役賦文注付所當城尺丈音義屬之疏正義曰屬

下役也賦文謂課付尺丈上既疏令下役之事以告

諸侯令諸國國各出若干之役築若干之丈故云屬

役賦文書書以授帥注帥諸侯之大夫音義帥所類

而效諸劉子注效致也音義孝反韓簡子臨之以為

二月公疾徧賜大夫注從公者音義

徧音遍從才用反下同

大

夫不受賜子家子雙琥注琥玉器音義

琥音虎

疏

注正義曰

周禮大宗伯云以玉作六器以禮天地四方白琥禮西方鄭玄云虎猛象秋嚴禮經及記言琥多矣都不

說其狀蓋刻玉為虎形也

一環一璧輕服注細好之服疏

正義曰釋器云

肉倍好謂之璧肉好若一謂之環李巡曰肉倍好璧邊肉大其孔小也肉好若一其孔及邊肉大小適等

曰環也

受之大夫皆受其賜已未公薨子家子反賜於

府人曰吾不敢逆君命也大夫皆反其賜書曰公薨

于乾侯言失其所也注不薨路寢為失所○趙簡子

問於史墨曰季氏出其君而民服焉諸侯與之君死

於外而莫之或罪也對曰物生有兩有三有五有陪

貳故天有三辰注謂有三音義

陪蒲
回反

地有五行注謂

有五體有左右注謂有兩各有妃耦注謂陪貳音義

妃音
配

王有公諸侯有卿皆有貳也天生季氏以貳魯

侯為日久矣民之服焉不亦宜乎魯君世從其失季

氏世脩其勤民忘君矣雖死於外其誰矜之社稷無

常奉注奉之無常人言唯德也音義

從子用反
本亦作縱

君臣

無常位自古以然注史墨跡古今以實言故詩曰高

岸為谷深谷為陵注詩小雅言高下有變易疏


正義曰詩

小雅十月之交大夫刺幽王也

三后之姓於今為庶主所知也注三

后虞夏商疏

注正義曰從周而上故數此三代三代子孫自有為國君者言其賤者為庶人也

在易卦雷乘乾曰大壯  注乾下震上大壯震

在乾上故曰雷乘乾疏

正義曰乾為天為剛震為雷為動天以剛而動動則為雷

壯之大者故曰大壯 天之道也注乾為天子震為諸侯而在上

君臣易位猶臣大強壯若天上有雷疏

注正義曰說卦乾為天為

君君之極尊者是天子也震為長子其卦云震驚百里聲達百里之內而有震懼之威是諸侯而在天子之上象如君臣易位是天之道也

昔成季友桓之季也文姜之愛子

也始震而卜卜人謂之曰生有嘉聞注嘉名聞於世

音義

始震如字一音身開音問

疏

正義曰震動也懷妊始動知有震娠而卽卜也

其名曰

友為公室輔及生如卜人之言有文在其手曰友遂

以名之既而有大功於魯注立僖公音義

名之音武政反

受

費以為上卿至於文子武子注文子行父武子宿音

義

費音秘

世增其業不廢舊績魯文公薨而東門遂殺

適立庶魯君於是乎失國注失國權音義

適丁歷反

政在

季氏於此君也四公矣民不知君何以得國是以為

君慎器與名不可以假人注器車服名爵號疏

正義曰器

謂車服也名謂爵號也借人名器則君失位矣故不可以假人也言魯君失民是借季氏以權柄故令昭公至此出外因以戒人君使懲創也

春秋左傳注疏卷五十三

春秋左氏傳注疏卷五十三考證

傳及有夏孔甲擾于有帝疏杼子帝芬芬子帝芒芒子

帝世世子帝不降不降弟帝喬喬子帝廣也○臣召

南按此疏据帝王世紀也若夏本紀少康子帝宁卽

世紀之帝杼杼子槐不作帝芬芒子帝泄不作帝世

不降弟帝扁不作帝喬扁子帝廩不作帝廣卽金履

祥前編亦依史記也

傳帝賜之乘龍河漢各二注合為四○臣召南按夏本

紀言天降龍二有雌雄當是用此傳而忘其為各二耳

傳以更豕韋之後○

臣召南

按夏本紀作受豕韋之後

集解引賈逵曰劉累之後至商不絕以代豕韋之後
祝融之後封于豕韋殷武丁滅之

傳周易有之疏九二同人卦爻九五大 有卦爻○監本
脫二卦字以上文乾之初九姤卦爻下文上九夬卦
爻例之則此二句應有卦字今添

傳若不朝夕見誰能物之○臣照按左氏之為傳信以

傳信疑以傳疑皆以紀事左氏不着一語也如此傳
泰龍語極荒唐蓋太史墨離夏孔甲千年得諸傳聞
而不知惟不能生得之謂龍惟不能生得故易于乾
取象于龍乃述所聞于魏獻子左氏記之謂當時賢
士大夫而其言龐猶如此耳

傳世不失職遂濟窮桑疏杜以少皞之世以鳥名官不

得有木正火正○

臣召南

按如杜說則木正等官皆

在顓頊之世與郊子所言顓頊以下命以民事者合
傳有烈山氏之子曰柱為稷疏後為農神也○監本訛
作為神農也今改正

又疏蓋柱人名○人監本訛作地今改正

春王正月公在乾侯○

臣召南

按此聖人特筆注但作

釋不朝正于廟非也劉敞曰以存公也公居于鄆有
魯也在乾侯無魯也公雖無魯魯不可無公也

傳非公且徵過也○

臣召南

按左氏不知君臣大義宜

為公羊家所排夫昭公無道失國何待經書所在而後見乎不言經嚴名義以警亂臣但言非公徵過謬矣杜注孔疏抑又甚焉趙汭補注曰鄆在境內故以書至書居為義乾侯晉地故書所在見公出在外也季孫意如會晉荀躒于適歷○陸淳曰季孫逐君之臣也晉不罪之而反為會晉侯之為盟主可知矣荀躒之為人臣可知矣王應麟曰列國大夫之無君晉為之也會于戚而不討孫林父會于夷儀而不討崔杼

會于適歷而不討意如君臣之義不明而大夫篡奪之禍晉自及矣

晉侯使荀躒唁公于乾侯○陸淳曰乾侯晉地故不言來唁

黑肱以濫來奔注不書邾史闕文○臣浩按公羊穀梁解不言邾之意不如杜注直截

傳入郢必以庚辰注庚午有變日在辰尾○臣召南按

監本作庚辰有變誤也杜言史墨所以能知入郢必

是庚辰日者以今年日變始于庚午則後之入郢必
以庚日干也今年日變在辰尾則後之入郢必以辰
日支也

傳越得歲而吳伐之疏斗十二度至于牽牛初度乃為
牛耳○監本訛作乃為申耳今改正

傳昔成王合諸侯城成周以為東都崇文德焉注所以

崇文王之德○

臣召南

按東都之作專為朝會則崇

文德乃對武功言不必曰崇文王之德也

傳天生季氏以貳魯侯○王應麟困學紀聞曰簡子在
晉猶季氏在魯也史墨之對何其悖哉張睢陽責令
狐潮曰未識人倫焉知天道臣照按左氏記史墨之
對猶後代列史記亂臣之言耳而後世必欲以此等
為左氏罪

傳是以為君慎器與名不可以假人○趙汭補注曰史
墨對趙簡子與襄十四年師曠對晉侯皆釋君助臣
阿附强家所謂社稷無常奉君臣無常位乃黨逆附

篡之辭不可為訓

臣照

按史墨對趙簡子言簡子臣

也則為黨逆附篡師曠對晉侯言則為納忠陳善之
語趙氏混而一之失其旨矣

春秋左氏傳注疏卷五十三考證

欽定四庫全書

春秋左傳注疏卷五十四

起定公元年
盡四年

晉杜氏注

唐陸德明音義

孔穎達疏

定公音義

陸曰定公名宋襄公之子昭
公之弟諡法安民大慮曰定
世宗定公

名宋襄公之子昭公之弟史傳不言其母不知誰
所生也以敬王十一年卽位諡法安民大慮曰定

經元年春王注公之始年而不書正月公卽位在六月

故疏

注正義曰凡新君初立必於歲首元日朝正於廟
因卽改元正位百官以序國史因書於策云元年

春王正月公卽位也其或國有事故不得行卽位之禮
國史亦書元年春王正月見此月公應卽位而有故不

得隱莊閔僖四公元年無事而空書春王正月其義也
此年不書正月者公卽位在六月故也傳稱昭公喪及
壞墮公子宋先入則正月之時定公猶從昭公之喪在
於乾侯未入魯境國內無君不是卽位闕禮故不須書
正月也釋例曰癸亥公之喪至自乾侯戊辰公卽位喪
在外踰年乃入故因五日改殯之節國史用元年卽位
之禮因以元年爲此年也然則正月之時未有公矣公
未卽位元必不改而於春夏卽稱元年者公未卽位必
未改元未改之日必乘前君之年於時春夏當名此年
爲昭公三十三年及六月旣改之後方以元年紀事及
史官定策須有一統不可半年從前半年從後雖則年
初亦統此歲故八年卽稱元年也漢魏以來雖於秋冬
改元史於春夏卽以元
年冠之是有因於古也

三月晉人執宋仲幾于京師注晉執人于天子之側而

不以歸京師故但書其執不書所歸音義

幾音機

疏

注正義曰

晉執仲幾傳無日月據經所書是三月始執案傳則不然也傳稱辛巳合諸侯之大夫子狄泉長歷推辛巳是正月七日也既會而魏舒始卒庚寅哉是正月十六日也宋仲幾不受功當於裁時不肯役耳士彌牟云晉之從政者新是士鞅已代魏舒矣乃執仲幾以歸三月歸諸京師必是既裁之後三月以前執以歸晉至三月乃歸於京師耳經書三月始執者晉人初執不告後知以歸不可至三月復歸於京師諱其以歸乃歸王故以三月初執告也縱晉執人諸侯不得相治事當使歸決於天子況在天子之側不以歸於京師晉人自知不可不以歸晉告魯故經但書其執不書所歸既不言歸王亦不言歸晉是不以所歸告也

夏六月癸亥公之喪至自乾侯注告於廟故書至○戊

辰公卽位注定公不得以正月卽位失其時故詳而日

之記事之宜無義例疏

注正義曰公羊傳曰卽位不日此何以日錄乎內也穀梁以爲

公喪在外踰年六月乃得卽位危故日之左氏無此義故杜顯而異之正月卽位正也定公不得以正月卽位爲失其時故詳而日之直記事之宜書曰無義例

秋七月癸巳葬我君昭公注公在外薨故八月乃葬

九月大雩注無傳過也音義

雩音于

立煬宮注煬公伯禽子也其廟已毀季氏禱之而立其

宮書以譏之音義

煬羊讓反禱丁老反

疏

注正義曰諡法好內怠政曰煬煬公伯禽子世

本世家文諸侯之禮親廟有四計煬公玄孫既薨其廟既已毀矣李氏禱于煬公以求昭公不入公死於外謂禱有益而更立其宮賽之於禮不合更立惡其改變國典故書以譏之公羊穀梁皆云立者不宜立立煬宮非禮也

冬十月隕霜殺菽注無傳周十月今八月隕霜殺菽非

常之災音義

隕于敏反菽本又作叔音同

疏

注正義曰月令九月霜始降八月未應霜殺菽

菽者大豆之苗又是耐霜之穀今以八月隕霜霜能殺菽是非常之災故書之僖三十三年隕霜不殺草此云殺菽彼言不殺草者穀梁傳曰未可以殺而殺舉重可殺而不殺舉輕其曰菽舉重也

傳元年春王正月辛巳晉魏舒合諸侯之大夫于狄

泉將以城成周魏子涖政注涖臨也代天子大夫為

政音義

涖音利
又音類

衛彪僊注衛大夫曰將建天子注立

天子之居而易位以令非義也大事奸義必有大咎

晉不失諸侯魏子其不免乎是行也魏獻子屬役於

韓簡子及原壽過注簡子韓起孫不信也原壽過周

大夫音義

奸音干咎其九反屬
之欲反過古禾反

疏

正義曰往年傳魏
子南面衛彪僊云

干位以令此云魏子涖政彪僊云易位以令文不同
者郊特牲云君之南鄉答陽之義也臣之北面答君
也然則禮國君乃南面往年魏子亦南面是干君之
位故云干位此時諸國為天子築城但當為君各致

徒役而已宜使天子之臣自號令之而魏子淮政代天子大夫改易上下故為易位所譏別故其文異

而田於大陸焚焉注禹貢大陸在鉅鹿北嫌絕遠疑

此田在汲郡吳澤荒蕪之地火田并見燒也爾雅廣

平曰陸音義

蕪音無

疏

注正義曰禹貢云導河積石至于大伾北過降水至于大陸孔

安國云大陸澤名釋地十藪云晉有大陸郭璞曰今鉅鹿北廣阿澤孫炎曰廣阿猶大陸以地名言之近為是也計鉅鹿之城與周相去千有餘里魏子不應往彼田獵故嫌絕遠疑此田當在汲郡吳澤吳澤在脩武縣北還卒於甯甯即脩武城是也當時荒蕪之地故亦以大陸名焉引爾雅以證平地皆名陸也案爾雅高平曰陸杜言廣平者以吳澤之地地下寬平故以廣平言之非是不見爾雅劉君以爾雅高平曰

陸而規杜氏非

還卒於甯注甯今脩武縣近吳澤音義

近附

近范獻子去其柏椁以其未復命而田也注范獻子

代魏子為政去其柏椁示貶之音義

去起呂反注同椁音郭

疏

正義曰喪大記云君松椁大夫柏椁士雜木椁是卿葬於禮用柏椁也以其未復君命而為田獵故獻子去其柏椁不使用也○孟懿子會城成周注不書公未即位疏

注正義曰懿子往年唯受號令知所得丈尺人功而已今復將徒役城之計當更書之於策以公未即位無君可告故不書庚寅裁注裁設板築音義裁才代反又音再注同宋

仲幾不受功曰滕薛卿吾役也注欲使三國代宋受

功役也音義

郛五兮反
小邾國

薛宰曰宋為無道絕我小國

於周以我適楚故我常從宋晉文公為踐土之盟注

在僖二十八年曰凡我同盟各復舊職若從踐土若

從宋亦唯命仲幾曰踐土固然注固曰從舊薛舊為

宋役薛宰曰薛之皇祖奚仲居薛以為夏車正注皇

大也奚仲為夏禹掌車服大夫音義

夏戶雅
反注同

奚仲遷

于邳注邳下邳縣音義

邳皮
悲反

仲虺居薛以為湯左相

注仲虺奚仲之後音義

虺許鬼反
相息亮反

若復舊職將承王

官何故以役諸侯注承奉也仲幾曰三代各異物薛

焉得有舊注言居周世不得以夏殷為舊音義

馬於虔反

為宋役亦其職也士彌牟曰晉之從政者新注言范

獻子新為政未習故事疏

注正義曰魏舒以辛巳會諸國至庚寅相去唯十日

耳魏舒始卒已得范鞅代者范鞅本是中軍之佐於次當代魏舒蓋晉人聞舒卒而馳使代之子姑

受功歸吾視諸故府注求故事仲幾曰縱子忘之山

川鬼神其忘諸乎注山川鬼神盟所告士伯怒謂韓

簡子曰薛徵於人注典籍故事人所知也宋徵於鬼

注取證於鬼神宋罪大矣且已無辭而抑我以神誣

我也啓寵納侮其此之謂矣注開寵過分則納受侵

侮音義

侮亡甫反分扶問反

疏

正義曰尚書說命傳說進戒於王云無啓寵納侮古有此言故

云其此之謂矣開彼寵人過其本分其人不知必止足乃至侵侮在上據在上受之故云納侮

仲幾為戮乃執仲幾以歸三月歸諸京師注知以歸

不可故復歸之京師音義

復扶又反

城三旬而畢乃歸諸

侯之戍齊高張後不從諸侯注後期不及諸侯之役

晉女叔寬曰周萇弘齊高張皆將不免注叔寬女寬

也音義

良反

長叔違天高子違人注天既厭周德長

弘欲遷都以延其祚故曰違天諸侯相率以崇天子

而高子後期故曰違人音義

厭於艷反祚才故反

天之所壞不

可支也衆之所為不可奸也注為哀三年周人殺長

弘六年高張來奔起○夏叔孫成子逆公之喪于乾

侯注成子叔孫姑之子季孫曰子家子亟言於我未

嘗不中吾志也吾欲與之從政子必止之且聽命焉

注衆事皆諮問于家子音義

亟起冀反中丁仲反

疏

正義曰言子家子數

於公處致言於我云意如事君不敢不改又言君以一乘入於魯師季孫必與君歸季孫之意實然故云未嘗不中吾志吾欲與之從政欲用為大夫也公喪歸則從者散故令止之且聽命者一聽于家之所為子家欲將歸者即與之歸

子家子不見叔孫易幾而哭注幾哭會

朝如字

叔孫請

見子家子子家子辭曰羈未得見而從君以出注出

時成子未為卿音義

羈居宜反子家子名見賢通反下同從才用反注義從同又如

字下從君從公放此

君不命而薨羈不敢見注言未受昭公之

命託辭以距叔孫叔孫使告之曰公衍公為實使羣

臣不得事君注二子始謀逐季氏疏

注正義曰謀逐季氏公為之

傳文不言公衍謀也但以公衍見復為大子季氏欲俱廢之故言此也

若公子宋主社

稷則羣臣之願也注宋昭公弟定公凡從公出而可

以入者將唯子是聽子家氏未有後季孫願與子從

政此皆季孫之願也使不敢以告注不敢叔孫成子

名對曰若立君則有卿士大夫與守龜在羈弗敢知

若從君者則貌而出者入可也注貌出謂以義從公

與季氏無實怨音義

守手又反

寇而出者行可也注與季

氏為寇讐者自可去若羈也則君知其出也注君昭

公而未知其入也羈將逃也喪及壞隤公子宋先入

從公者皆自壞隤反注出奔音義

壞徐音懷又戶怪反隤徒回反

六

月癸亥公之喪至自乾侯戊辰公即位注諸侯薨五

日而殯殯則嗣子即位癸亥昭公喪至五日殯於宮

定公乃即位疏

正義曰王制云天子十日而殯諸侯五日而殯自癸亥至戊辰五日殯訖

則嗣子即位故定公以此日即位也公羊穀梁皆云正棺於兩楹之間然後即位案正棺兩楹之間即禮所謂夷於堂者也喪大記君薨之禮云既小斂男女奉尸夷於堂鄭玄云諸侯之小斂於死者俱三日此

戊辰去癸亥五日非正棺之日不得為正棺卽位也
雜記云諸侯行而死歸至於廟門遂入適所殯鄭玄
云適所殯謂兩楹之間自外來者正棺於兩楹之間
尸亦夷之於此因殯焉殯必於兩楹之間者以其死
不於室而自外來留之於中不忍遽也鄭取二傳之
說言死從外來者殯在兩楹之間若謂殯為正棺則
與杜言合矣
李孫使役如闕公氏將溝焉注闕魯羣公墓

所在也季孫惡昭公欲溝絕其兆域不使與先君同

音義

闕口暫反惡烏路反又如字

疏

正義曰闕是先公葬地春秋言氏猶如言家故謂公之墓

地為公氏言是公死之家宅也玄卿以為闕屬上句
公氏將溝焉猶言將溝公氏焉古人多倒語公氏則
昭公榮駕鸞曰生不能事死又離之以自旌也注駕鸞

魯大夫榮成伯也旌章也音義

駕音加驚五何反旌音精

縱子忍

之後必或恥之乃止季孫問於榮駕鸞曰吾欲為君

諡使子孫知之注為惡諡疏

注正義曰知者下文死又惡之所以知也

對

曰生弗能事死又惡之以自信也將焉用之乃止音

義

惡之如字又烏路反焉於虔反

疏

正義曰信明也以自明已之不臣也

秋七月癸巳

葬昭公於墓道南孔子之為司寇也溝而合諸墓注

明臣無貶君之義疏

正義曰孔子之為司寇在定公十年以後未知何年溝之

○

昭公出故季平子禱于煬公九月立煬宮注平子逐

君懼而請禱於煬公昭公死於外自以為獲福故立

其宮疏

正義曰既毀其廟而得禱者蓋就祧而禱之

○周鞏簡公棄其子

弟而好用遠人注簡公周卿士遠人異族也為明年

鞏氏賊簡公張本音義

鞏九勇反好呼報反疏正義曰諡法平

經二年春王正月

夏五月壬辰雉門及兩觀災注無傳雉門公宮之南門

兩觀闕也天火曰災音義

觀古亂反注及下同疏注正義曰明堂

臯門雉門天子應門是魯之雉門公宮南門之中門也釋宮云觀謂之闕郭璞曰宮門雙闕周禮大宰正月之

吉縣治象之法于象魏使萬民觀治象鄭衆云象魏闕也劉熙釋名云闕在門兩旁中央闕然為道也然則其上縣法象其狀魏魏然高大謂之象魏使人觀之謂之觀也是觀與象魏闕一物而三名也觀與雉門俱災則兩觀在雉門之兩旁矣公羊傳曰其言雉門及兩觀災何兩觀微也然則曷為不言雉門災及兩觀主災者兩觀也主災者兩觀則曷為後言之不以微及大也穀梁亦云災自兩觀始先言雉門尊尊也公羊稱子家駒云設兩觀諸侯僭天子其意以其奢僭故天災之左氏無此義案禮器云天子諸侯臺門此以高為貴也郊特牲云臺門大夫之僭禮也唯言大夫異於諸侯不言諸侯異於天子兩觀為僭禮無其丈天之所災不可意卜言主災兩觀以門尊先門若災先從門起又將何以為異丘明無文或是災起雉門而延及兩觀也天火曰災宣十六年

傳例

秋楚人伐吳注囊瓦稱人見誘以敗軍音義

囊乃郎反

冬十月新作雉門及兩觀注無傳

傳二年夏四月辛酉鞏氏之羣子弟賊簡公注傳言

棄親用疎所以敗也○桐叛楚注桐小國廬江舒縣

西南有桐鄉吳子使舒鳩氏誘楚人注舒鳩楚屬國

曰以師臨我注教舒鳩誘楚使以師臨吳我伐桐為

我使之無忌注吳伐桐也偽若畏楚師之臨已而為

伐其叛國以取媚者也欲使楚不忌吳所謂多方以

誤之音義

為我于偽反注及下同

疏

正義曰桐是小國世屬於楚桐今叛楚楚有間隙故

吳子固是而謀之舒鳩自是楚之屬國居吳楚之間亦兩取其意故意吳得使之也吳子使舒鳩誘楚人又放舒鳩為辭曰令楚以師臨我我吳自稱我令楚臨吳也我當偽若畏楚為楚伐桐女舒鳩當為我誘楚我軍楚師或曰囊瓦本出師伐吳見吳欲伐桐而不設備遂被吳敗之又擊楚巢邑潛師圍而克之獲其守邑大夫為我使之無忌謂為我之畏楚形狀使楚人無復防忌於我也若楚不忌吳則師不設備欲因其無備而掩襲取之耳下云吳人見舟于豫章偽欲伐桐也吳軍楚師于豫章掩其不備也潛師于巢吳人詐巢邑人云此師將伐桐也其實本擬取秋楚巢故下遂圍巢克之言潛者對豫章之師稱潛

秋楚

囊瓦伐吳師于豫章注從舒鳩言吳人見舟于豫章

注偽將為楚伐桐音義

見賢通反

而潛師于巢注實欲以

擊楚冬十月吳軍楚師于豫章敗之注楚不忌故遂

圍巢克之獲楚公子繁注繁守巢大夫○邾莊公與

夷射姑飲酒私出注射姑邾大夫出辟酒音義

射音亦一

音夜闔乞肉焉奪之杖以敲之注奪闔杖以敲闔頭也

為明年邾子卒傳音義

闔音昏守門人也敲苦孝反又苦學反說文作敲云擊頭

也字林同又一曰擊聲也口交反又口卓反訓從敲云橫槌也又或作茅或作刺口交反

經三年春王正月公如晉至河乃復注無傳疏

正義曰三傳皆

無其說不知何故乃復賈逵云刺緩朝見辭失所不諱
罪已賈雖為此解於傳無大不可從故杜不言劉炫謂
公以六月卽位此年便卽往朝於事未為緩也晉人何
以辭之若以緩見譴當退謝罪何由此後更無謝處空
言罪已經無孫謝自罪之狀復安在乎晉若以緩致辭
必當更有譴責何由明年會次復得依常班序乃復之
意不可懸知

二月辛卯邾子穿卒注再同盟音義

穿音川

疏

注正義曰穿以昭二

年卽位十一年盟于祿祥二十六年于鄆陵皆魯邾俱在是再同盟也

夏四月

秋葬邾莊公注六月乃葬緩

冬仲孫何忌及邾子盟于拔注拔地闕音義

拔皮八反

傳三年春二月辛卯邾子在門臺注門上有臺臨廷

閭以鉞水沃廷邾子望見之怒閭曰夷射姑旋焉注

旋小使音義

廷音庭下竝同鉞步丁反本又作瓶

命執之注見其不潔

執射姑弗得滋怒自投于牀廢于鑪炭爛遂卒注廢

隋也音義

鑪力吳反炭他旦反隋徒火反

先葬以車五乘殉五人注

欲藏中之潔故先內車及殉別為便房蓋其遺命音

義

先悉薦反又如字乘繩證反殉辭俊反藏才浪反

疏

注正義曰以人從葬謂之殉邾子好潔以

人為殉欲備地下掃除若令與柩同入恐其汚履藏
內欲其藏中之潔故先內車及殉別為便房處之傳
言此事意在非責邾子若是葬者自為則非莊公之
罪無為輒說此事故云蓋其遺命也邾子隊鑪而卒
不應得有遺命疑其是遺命者禮國君卽位而為禭
初立卽營死事當是平素之時先有此命葬者奉行

之莊公卞急而好潔故及是注卞躁疾也音義

卞皮彦反

好呼報反下文及注同躁早報反

○秋九月鮮虞人敗晉師于平中

注平中晉地獲晉觀虎恃其勇也注為五年士鞅圍

鮮虞張本○冬盟于郟注郟卽拔也音義

郟音談

脩邾

好也注公卽位故脩好○蔡昭侯為兩佩與兩裘注

佩佩玉也以如楚獻一佩一裘於昭王昭王服之以
享蔡侯蔡侯亦服其一子常欲之弗與三年止之唐
成公如楚有兩肅爽馬子常欲之注成公唐惠侯之

後肅爽駿馬名音義

肅如字又所六反
爽音霜駿音俊

疏

注正義曰
宣十二年

傳有唐惠侯故云唐惠侯之後也釋畜於馬無肅爽
之名爽或作霜賈逵云色如霜純馬融說肅爽鴈也
其羽如練高首而脩頸馬似之天下稀有故子常欲
之杜以馬名臨時所作本意不可得知故直云駿馬

名弗與亦三年止之唐人或相與謀請代先從者許

之音義

從才用
反下同

疏

正義曰謂請楚楚許之也知非請
唐侯者若唐侯許之自合養馬何

須言飲先從者
竊馬以獻乎

飲先從者酒醉之竊馬而獻之子常

子常歸唐侯自拘於司敗注竊馬者自拘音義

飲於
鳩反

拘九
子反

曰君以弄馬之故隱君身注隱憂約也音義

弄
魯

貢
反

棄國家羣臣請相夫人以償馬必如之注相助也

夫人謂養馬者音義

相息亮反夫音扶
注同償市亮反

唐侯曰寡人

之過也二三子無辱皆賞之蔡人聞之固請而獻佩

于子常子常朝見蔡侯之徒命有司曰蔡君之久也

官不共也注言楚所以禮遣蔡侯之物不共備故音

義

共音恭
注同

明日禮不畢將死注遣蔡侯之禮蔡侯歸

及漢執玉而沈曰余所有濟漢而南者有若大川注

自誓言若復渡漢當受禍明如大川音義

沈音鴉復
扶又反

蔡侯如晉以其子元與其大夫之子為質焉而請伐

楚注為明年會召陵張本音義

質音
致

經四年春王二月癸巳陳侯吳卒注無傳未同盟而赴

以名癸巳正月七日書二月從赴疏

注正義曰杜以長
歷校之知癸巳是

正月七日故云書二月從赴也知非日誤者以崩薨之
事皆以赴為文故平王崩赴以庚戌陳侯卒赴以甲戌

已丑杜休大例而言故云從赴劉炫以為諸侯五月而葬下云六月葬陳惠公則陳侯卒在二月以為日誤而規杜氏今知非者但諸侯雖五月可葬春秋之時或緩或速無復常準此陳侯之葬事既無傳何知必五月而葬妄以杜為失其義非也

三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏

于召陵侵楚注於召陵先行會禮入楚竟故書侵音義

夏戶雅反召上照反竟音境

疏

注正義曰先言於召陵後言侵楚是於召陵先行會禮也土地名召陵楚

地也諸侯既入楚竟先行會禮後乃侵之故經書先會後侵也

夏四月庚辰蔡公孫姓帥師滅沈以沈子嘉歸殺之音

義

公孫姓本又作生姓音生

五月公及諸侯盟于臯鼬注召陵會劉子諸侯總言之

也繁昌縣東南有城臯亭復稱公者會盟異處故音義

鼬由又反復扶

疏

注正義曰書經之例諸侯先會而後盟皆前目而後凡此共盟者還是前

會之諸侯前已歷序故於此總言之也劉子雖是王朝之臣而亦有封爵故諸侯之文可以兼劉子也僖二十年王子虎與諸侯盟于翟泉貶之稱人此劉子得與諸侯盟者楚僭號稱王不事天子諸侯會而侵楚將以尊崇王室傳言劉文公合諸侯是天子敕之使盟也下文書劉卷卒葬魯人弔會侖同盟之禮知劉子亦與盟

也復稱公者由其會盟異處故也劉炫規杜云會盟異處故復稱公案襄二十五年盟重丘亦是會盟異處何以不言公今刪定知非者但會盟異處理合稱公重丘不書公史官自略耳以此規杜非也

杞伯成卒于會注無傳音義

成音城

疏

正義曰成以昭二十五年卽位二十

六年盟于鄆陵三十二年于翟泉此年于臯鼫魯杞俱在計杜當云三同盟無注者漏脫耳諸侯薨于朝會加一等此旣薨于會其禮亦當然

六月葬陳惠公注無傳

許遷于容城注無傳

秋七月公至自會注無傳

劉卷卒注無傳卽劉蚩也劉子奉命出盟召陵死則天

王為告同盟故不具爵音義

卷音權一音眷免反蚩扶粉反為于偽反下吳為蔡

同疏

注正義曰昭二十二年傳曰單子立劉蚩卽此是也世族譜伯蚩劉蚩劉文公劉狄劉卷劉子為一

人王朝公卿卒不赴魯魯不會葬丈三年書王子虎卒傳曰來赴弔如同盟禮也彼為同盟于翟泉故也此亦書卒明為同盟故也畿內之國不得外交諸侯必非劉邑之臣來赴知是天子為告也天子告臣略言名封而已不言劉子故書不具爵

葬杞悼公注無傳

楚人圍蔡注不服故也

晉士鞅衛孔圉帥師伐鮮虞注無傳孔圉孔羈孫士鞅

卽范鞅音義

圉魚呂反

葬劉文公注無傳

冬十有一月庚午蔡侯以吳子及楚人戰于柏舉楚師

敗績注師能左右之曰以皆陳曰戰大崩曰敗績吳為

蔡討楚從蔡計謀故書蔡侯以吳子言能左右之也囊

瓦稱人貪以致敗不能死難罪賤之柏舉楚地昭三十

一年傳曰六年十二月庚辰吳入郢今以十一月者并

數閏音義

陳直觀反難乃疏注正義曰師能左右之曰旦反數所主反以僖二十六年傳例也皆

陳曰戰大崩曰敗績莊十一年傳例也吳大蔡小而蔡能以吳者吳子為蔡討楚言蔡能左右之也釋例曰吳雖大國順蔡侯之請自將其衆唯蔡侯之命故亦言以吳子也囊瓦楚之上卿當稱名氏今稱人者貪以致敗又不能死難罪賤之也釋例曰楚之囊瓦貪珮馬以致討稱人罪賤之也昭三十一年傳言六年十二月庚辰吳入郢今以十一月與彼期有差殊者長歷推此年閏十月庚辰又是十一月二十九日其月垂盡并數閏得為十二

楚囊瓦出奔鄭注書名惡之音義

惡烏路反疏注正義曰

大八年宋司城來奔十四年宋子哀來奔傳皆云貴之也不稱名為貴之是稱名為惡之庚辰吳入

郢注弗地曰入吳不稱子史略文疏

注正義曰弗地曰入襄十三年傳例

也上文戰稱吳于此言吳入楚不稱子猶成二年鄭伐許昭十二年晉伐鮮虞史略文無義例公羊穀梁以為吳於戰稱子為其憂中國故進而稱爵及其入郢君舍于君室大夫舍于大夫室反為夷狄之行故貶而稱吳左氏無此義故杜異而顯之

傳四年春三月劉文公合諸侯于召陵謀伐楚也注

文公王官伯也晉人假王命以討楚之久留蔡侯故

曰文公合諸侯

疏

注正義曰劉子是天子大臣故言王官伯也往年蔡侯如晉請晉耳

不請天子今稱劉文公合諸侯知是晉人告王假王命以討楚王使劉子會之故言劉文公合諸侯以示

稟於王命假王威也

晉荀寅求貨於蔡侯弗得言於范獻子曰

國家方危諸侯方貳將以襲敵不亦難乎水潦方降

疾瘡方起中山不服注中山鮮虞音義

潦音老瘡魚略反

棄

盟取怨無損於楚注晉楚同盟伐之為取怨而失中

山不如辭蔡侯吾自方城以來楚未可以得志注晉

敗楚侵方城在襄十六年祇取勤焉乃辭蔡侯晉人

假羽旄於鄭鄭人與之注析羽為旌王者遊車之所

建鄭私有之因謂之羽旄借觀之音義

祇音支旄音毛析星曆反

下放疏注正義曰周禮司常掌九旗之名物全羽為此
旌析羽為旌道車載旌遊車載旌鄭玄云全

羽析羽皆五采繫之於旒旌之上所謂注旒於千首也凡九旗之帛皆用絳道車象路也王以朝夕燕出入遊車木路也王以田以鄙是其析羽為旌王者遊車之所建也釋天云注旒首曰旌李巡曰以旄牛尾著旌首者也孫炎曰析五采羽注旌上亦有旒繆據彼文言之則羽毛者有五色鳥羽又有旌牛尾也言全羽析羽者蓋有全取其翅或析取其翮故有全析二名也繫此鳥羽牛尾於千首猶自別有絳為旒繆縣之於千今之旗幟猶然此傳直言羽耳注不引全羽而以析羽解之者以全羽尊於析羽鄭人所有未必尊貴故以析羽解之計羽旌所用其費無多晉人自應有之而襄十四年范宣子假羽毛於齊此又假羽旌於鄭者或當制作明日或旒以會注或賤者也巧異故聞而借觀之

繼旒曰旒令賤人施其旒執以從會示卑鄭音義

旒步

貝反旄音兆令力疏注正義曰鄭玄注論語云或云呈反下欲令蔡同言有人不顯其名而略稱為或

是或為賤者也繼旄曰旂釋天文也郭璞曰帛續旄末為燕尾者然則旂謂旂身旂為旂尾晉令賤人建

此羽旄施其旒旒於下執之以從其會本謂其美而就鄭借觀之既得其物令賤人服用之是示其卑侮

鄭也鄭是列國而晉卑侮之諸侯於是知晉於是乎晉輕蔑心皆怨恨故晉於是乎失諸侯

失諸侯注傳言晉無禮所以遂弱將會衛子行敬子

言於靈公注子行敬子衛大夫曰會同難注難得宜

嘖有煩言莫之治也注嘖至也煩言忿爭音義嘖仕責反

一音責爭疏注正義曰嘖至賈逵云然是相傳訓也爭鬬之爭疏易繫辭云聖人有以見天下之賾謂見

其至深之處蹟亦深之義也謂至於會時有煩亂忿爭之言無才辨者則莫之能治也 其使祝

佗從注祝佗大祝与魚音義佗徒何反從才用反下師從旅從同大音泰下

大祝犬卜大史大原同公曰善乃使子魚子魚辭曰臣展四體

以率舊職猶懼不給而煩刑書若又共二注共二職

音義

共音恭注同

徼大罪也且夫祝社稷之常隸也注隸

賤臣也音義

徼古堯反夫音扶

社稷不動祝不出竟官之制

也注社稷動謂國遷音義

竟音境下同

疏

注正義曰周禮大祝云大師宜

于社造于祖設軍社及軍歸獻于社則前祝天子之祝如此則諸侯之祝官亦然也然則彼軍行唯有社

無稷今社稷俱動故知謂國遷也國遷唯在竟內得云祝不出竟者詩稱公劉遷豳大王來岐及春秋杞都陳留而遷緣陵及許遷于析之屬竝是離棄本國遠適它土故有出竟之事劉以社稷動謂軍行而規也杜非君以軍行祓社釁鼓注師出先有事祓禱於社

謂之宜社於是殺牲以血塗鼓鼙為釁鼓音義

祓音弗徐

音廢釁許靳反鼙步西反本又作鞞

疏

注正義曰釋天云起大事動大衆必先有事乎社而後出謂之

宜是軍師將出必有祭社之事也周禮女巫掌祓除釁浴則祓亦祭名故知祓社卽宜社是也說文云釁血祭也是殺牲以血塗鼓

鼙為釁鼓此皆祝官掌之

祝奉以從注奉社主也音

義

從如字又才用反

疏

正義曰禮軍行必以廟主社主從軍而行尚書甘誓云用命賞于祖弗用

命戮于杜孔安國云天子親征必載遷廟之祖主及社主行有功則賞祖主前示不專也不用命奔北者則戮之於社主前社主陰陰主殺親祖嚴社之義也是軍行必載社主行故祝官奉主以從於是

乎出竟若嘉好之事注謂朝會音義

好呼報反

君行師從

注二千五百人卿行旅從注五百人臣無事焉疏

正義

曰此會因而侵楚衛侯當以軍行而云臣無事者晉本以會召諸侯傳言將會是赴會之時未知將侵伐也但諸國既集師衆公曰行也及臯鼬注將盟將長自多故因得行侵耳

蔡於衛注欲令蔡先衛歆音義

長丁文反令力呈反先悉薦反下文先衛

同歆所洽反人所甲反

衛侯使祝佗私於萇弘曰聞諸道路不

知信否若聞蔡將先衛信乎萇弘曰信蔡叔康叔之

兄也注蔡叔周公兄康叔周公弟疏

注正義曰史記管蔡世家云武

王同母兄弟十人母曰大妣文王正妃也其長子曰伯邑考次曰武王發次曰管叔鮮次曰周公旦次曰

蔡叔度次曰曹叔振鐸次曰邶叔武次曰霍叔處次曰康叔封次曰聃季載如彼文則蔡叔周公弟也今

以蔡叔爲周公兄者以僖二十四年傳富辰言文之昭十六國蔡在魯上明以長幼爲次賈逵等皆言蔡

叔周公兄故杜從之馬遷之言多辟謬故不用史記爲說先衛不亦可乎子魚曰

以先王觀之則尚德也昔武王克商成王定之選建

明德以藩屏周故周公相王室以尹天下注尹正也

音義

藩方元反
相息亮反

於周為睦注睦親厚也以盛德見親

厚分魯公以大路大旂注魯公伯禽也此大路金路

錫同姓諸侯車也交龍為旂周禮同姓以封音義

分扶

問反下並同路本亦作輅音路疏注正義曰周禮巾

下皆同旂其依反錫星歷反車云金路建大旂以賓同姓以封鄭玄云金路以金飾諸末大旂九旗

之畫交龍者以賓以會賓客同姓以封謂王子母弟以功德出封若魯衛也夏后氏之璜注璜美玉名音

義

夏戶雅反下皆同璜音黃疏注正義曰夏后氏所寶歷代傳之

出於衛地公文氏攻之求夏后氏之璜焉則璜非一也尚書旅獒及魯語皆云古者分同姓以寶玉展親

則先王不以王賜向魋向魋自規求得之也鄭玄注周禮云半壁曰璜

封父之繁弱注

封父古諸侯也繁弱大弓名音義

父音甫下武父同封父國名繁扶元

反

疏

注正義曰鄭玄云古者伐國遷其重器以與同姓此繁弱封父之國為之不知何時滅其國而

得之也孔叢云楚王張繁弱之弓載忘歸之矢以射蛟于雲夢是繁弱為弓名也

殷民六族

條氏徐氏蕭氏索氏長勺氏尾勺氏使帥其宗氏輯

其分族將其類醜注醜衆也音義

索素各反下同勺市灼反下同輯音

集又七入反

以法則周公用卽命于周注卽就也使六族

就周受周公之法制是使之職事于魯注共魯公之

職事音義

共音恭下文以共王職同

以昭周公之明德注昭顯也

疏

正義曰使六族之長各自帥其當宗同氏輯合也合其所分枝屬族屬也將其族類人衆以法則周

公令其移家居魯用就受周公之命是以使之共職事于魯以昭周公之明德也下賜殷民七族亦是使

之法則康叔令共職事于衛也賜唐叔及懷姓九宗亦然

分之土田陪敦注陪增

也敦厚也音義

陪本亦作倍同步回反

疏

正義曰陪是加增之義敦厚釋詁文也言

既封為大國地方五百里又分以土田更增彼寬厚為七百里也明堂位云封周公于曲阜地方七百里鄭玄云公之地方五百里加魯以四等之附庸方百里者二十四并五五二十五積四十九開方之得七百里鄭玄周禮大司徒注云凡諸侯為牧正帥長及有德者乃有附庸公無附庸侯附庸九同伯附庸七

同子附庸五同男附庸三同進則取焉退則歸焉魯於周法不得有附庸故言錫之也地方七百里者包附庸以大言之附庸二十四言得兼此四等矣是增厚魯國之事也

祝宗卜史注大祝

宗人大卜大史凡四官備物典策注典策春秋之制

音義

策本又作冊亦作策或作箒皆初革反

官司彝器注官司百官也

彝器常用器音義

彝羊之反疏正義曰祝宗接神之官大

等官人使之將歸於魯也服虔云備物國之職物之備也當謂國君威儀之物若今織扇之屬備賜魯也杜不解備物則與典策為一也備物典策謂史官書策之典若傳之所云發凡之類賜之以法使依法書時事也官司彝器謂百官常用之器蓋罇鬯俎豆之屬具賜魯也

因商奄之民注商

奄國名也與四國流言或迸散在魯皆令卽屬魯懷

柔之音義

迸彼諍反令徐力呈反

疏

注正義曰書傳云武王殺紂繼公子祿父及管蔡流

言奄君謂祿父曰武王死成王幼周公疑此百世之時請舉事然後祿父及三監叛是奄與四國流言也昭九年傳云蒲姑商奄吾東土也此復云因商奄之民則商奄是東方之國近魯之地也昭元年傳云周有徐奄杜以彼奄與此商奄為一故土地名奄商奄二名共為一國此注言商奄國名以商奄二字為國名也詩稱四國流言毛傳以四國為管蔡商奄則商奄各自為國奄則此奄是也商謂紂子祿父下云管蔡啟商是名祿父為商也然則毛言商奄為二杜言商奄為一杜言四國流言亦謂管蔡祿父與商奄為四也商奄卽四國之一言與者據民與四國之君流言改言與也或者據奄君道三國為亂故言與總稱

四國非為商奄外別有四國也言封魯於少皞之虛則商奄非魯地也非魯地而言因其民是誅商奄之
日民或迸散在魯皆命使即屬於魯令魯懷柔之
命
玄卿以為三監與商為四國奄在外故言與四國

以伯禽注伯禽周公世子時周公唯遣伯禽之國故

皆以付伯禽疏

注正義曰詩魯頌說封魯之事云王曰叔父建爾元子俾侯于魯是伯禽

為周公世子也魯世家云周公相成王使其子伯禽代就封于魯文十三年公羊傳曰周公何以稱大廟于魯封魯公以為周公也周公拜乎前魯公拜乎後曰生以養周公死以為周公主然則周公之魯乎曰不之魯也封魯公以為周公則周公曷為不之魯欲天下之一乎周也其意言周公聖人若使之魯則恐天下迴心向之故不使之魯也以周公身不適魯唯遣伯禽之國故傳皆言分魯公不言分周公也傳言

命以伯禽於體例命以康誥命以唐誥則伯禽亦似
策命篇名今杜云唯遣伯禽之國故皆以付伯禽則
伯禽非是誥誓篇名若必是誥誓當云命以魯誥既
為國君不得與君牙伯同同類也劉炫云伯禽猶下
命以康誥是伯禽為命書似書序穆王命君牙
為周大司徒作君牙即以君牙為篇與此同也而封

於少皞之虛注少皞虛曲阜也在魯城內音義

少詩照反

注及下同皞胡老反虛起居反注及下皆同

疏

注正義曰此注少皞之虛即曲阜是也曲阜在魯城

內則魯之所都正在少皞虛矣昭二十九年注窮桑少皞之號窮桑地在魯北與此異者賈逵云少皞居窮桑登為帝蓋未為帝居魯北既為帝乃居魯也

分康叔注康叔衛之祖以

大路少帛績茂旃旌注少帛雜帛也績茂大赤取染

草名也通帛為旂析羽為旌音義

績七見反旂步貝反又音吠旂章然

反疏

注正義曰周禮司常云通帛為旌雜帛為物鄭玄云通帛謂大赤從周正色無飾雜帛者以帛

素飾其側白殷之正色大赤是通帛知少帛是雜帛也釋草云茹蘆茅蒐郭璞曰今之蒨也可以染絳則績是染赤之草旂即旂也爾雅繼旒曰旂旂是旂身旂是旂尾尾猶用赤則通身皆赤知績旂是大赤大赤即今之紅旗取染赤之草為名也蓋王以通帛雜帛並賜衛也然則大赤即是旂也於績旂之下更言旂者茂言旂尾旂言旂身圖其文故具言耳若其不然旌是干之所建旌皆有旌少帛旂旂之後何須更復言旌明是圖

大呂注鐘名疏

正義曰周鑄無射魯鑄林鍾皆以律名名

鍾知此大呂姑洗皆鍾名也其聲與此律相應故以律名焉

殷民七族陶氏施氏

繁氏錡氏樊氏饑氏終葵氏封畛土略自武父以南
及圃田之北竟注畛塗所徑也略界也武父衛北界

圃田鄭藪名音義

陶徒刀反繁步河反錡魚綺反畛之忍反一音真圃布五反本亦作

圃同塗音徒徑

疏

注正義曰周禮遂人云夫間有遂廣深各二尺遂上有徑容車馬也

十夫有溝廣深四尺溝上有畛容大車百夫有洫廣深八尺洫上有塗容乘車一軌千夫有澮廣二尋深

二仞澮上有道容二軌萬夫有川川上有路容三軌畛是路故為塗所徑也桓十二年公會鄭伯盟于武

父杜云陳留濟陽縣東北有武父城彼是鄭地與此武父非一也土地名云傳曰封畛土略自武父以南

則武父衛之北竟也非河南武父其地闕無處故直云衛北界也釋地十藪鄭有圃田郭璞曰今滎陽中

牟縣西圃田澤是也
衛之南竟至此澤畔

取於有閭之土以共王職注有

閭衛所受朝宿邑蓋近京畿音義

近附近之近

取於

相土之東都以會王之東蒐注為湯沐邑王東巡守

以助祭泰山音義

相息亮反蒐所求反守手又反

疏正義曰土地名有閭之土與相

土之東都其地皆闕無其處言共王職猶魯之許田蓋近京畿也會王東蒐則為從王巡守助祭泰山為湯沐之邑若鄭之祊田蓋近泰山也王巡守者諸侯為王守土天子以時出巡行之今言蒐則王之巡守亦因田獵以教習兵士

聘季授土注聘季周公弟司空音義

聘乃

甘疏

注正義曰富辰言文之昭聘季在魯下史記大反如十子聘季最少是周公弟也周禮司空主土

司徒主民知朋季授土為司徒也陶叔授民注陶叔司徒

命以康誥而封於殷虛注康誥周書殷虛朝歌也皆

啟以商政疆以周索注皆魯衛也啟開也居殷故地

因其風俗開用其政疆理土地以周法索法也音義

疆居良反疏注正義曰王制云凡居民材必因天地注及下同寒煖燥濕廣谷大川異制民生其間者

異俗脩其教不易其俗齊其政不易其宜是言王者布政當順民俗而施之也此民習商之政為日已久

還因其風俗開導以舊政也衛居殷虛開以商政可矣魯亦開以商政者王者所法不過二代夏在衛西

魯在衛東夏政非魯所及與衛大同以殷之餘民有六族將其醜類以即事于魯故與衛皆啟以商政也

疆理土地以周法則三代經界法皆有異其異未盡聞也索之為法相傳訓耳考工記量器銘曰時文思索允臻其極鄭亦以索為法分唐叔注唐叔晉之祖以大路密須

之鼓注密須國名闕羣注甲名音義

羣九勇反

沽洗注鐘

名音義

沽音孤洗息典反

懷姓九宗職官五正注懷姓唐之

餘民九宗一姓為九族職官五正五官之長音義

長丁

大反下文乃長衛同

疏

注正義曰懷姓居在晉地而不言殷民知是唐之餘民也言懷姓九宗則皆姓

懷矣知一姓而有九族也職官五正杜云五官之長則謂五官之長子孫耳曲禮云天子之五官曰司徒司馬司空司士司寇鄭玄云此殷時制也然則殷時五官居在唐地世為貴族以賜唐叔使主領之所以

榮寵唐叔也殷之五官不必皆在唐地但有三官四
官亦得總五言之劉炫云職官五正職主也正長也
主官事者有五長分九宗為五官使主之此九宗蓋
宗有一人數少者當宗不足立官并之為五使五官
領此九宗或以為於懷姓之內立五正使分主九宗
未知誰是故備言之或以為五官之長謂如昭二十
九年蔡墨所云五行之官長也是天子之大臣非唐
之遺民然姓而有五也并賜唐叔宣天子得以五行
官長賜諸侯哉命以唐誥而封於夏虛注唐誥命篇名也
夏虛大夏今大原晉陽也啟以夏政注亦因夏風俗
開用其政疆以戎索注大原近戎而寒不與中國同
故自以戎法三者皆叔也而有令德故昭之以分物

不然文武成康之伯猶多而不獲是分也唯不尚年

也疏

正義曰文武成康皆以處長而立未得更有兄伯封為諸侯而云伯猶多者以叔年稚於伯仲

處叔而得分多明其長者無所得伯是兄弟之長故舉伯以為言所云猶多者甚言之耳歷檢書傳文武成康未有兄為諸侯者幼者分物多長者無所得此唯為不尚年故也

管蔡啟商甚間

王室注甚毒也周公攝政管叔蔡叔開道紂子祿父

以毒亂王室音義

甚音忌間間廁之間道音導

王於是乎殺管叔

而蔡蔡叔注周公稱王命以討二叔蔡放也音義

蔡

叔上素達反注同下蔡叔如字

以車七乘徒七十人注與蔡叔車徒

而放之音義

乘繩證反

其子蔡仲改行帥德周公舉之以

為已卿士注為周公臣音義

行下孟反

見諸王而命之以

蔡注命為蔡侯音義

見賢遍反

其命書云王曰胡無若爾

考之違王命也注胡蔡仲名疏

正義曰書序云蔡叔既沒王命蔡仲踐諸

侯位作蔡仲之命其經云唯周公位冢宰正百工羣叔流言乃致辟管叔于商囚蔡叔于郭鄰以車七乘降霍叔于庶人三年不齒蔡仲克庸祇德周公以為卿士叔卒乃命諸王邦之蔡王若曰小子胡惟爾率德改行克慎厥猷肆予命爾侯于東土往即乃封敬哉爾尚蓋前人之愆惟忠惟孝率乃祖文王之彛訓無若爾考之違王命傳之此言皆述書意而為之辭唯增言徒七十人耳孔安國云郭鄰中國之外地名

亦不知何方地名也注正義曰甚毒間亂賈逵云然是相傳訓也道祿父作亂將以害周若毒螫然故云毒亂王室也蔡仲之命篇云周公乃致辟管叔于商囚蔡叔于郭鄰則是周公誅之矣而此言王者周公稱王命以討之書序云成王既伐管叔蔡叔是稱王命之文也說文云繫散之也從米殺聲然則繫字殺下米也繫為放散之義故訓為放也隸書改作已失字體繫字不復可識寫者全類蔡字至有為一蔡字重點以讀之者今定本作蔡非也孔安國云明王之法誅父用子言至公周公圻內諸侯二卿治事是為周公圻內采邑之卿也若之何其使蔡先衛也武王之母弟八

人周公為太宰康叔為司寇聃季為司空五叔無官豈尚年哉注五叔管叔鮮蔡叔度成叔武霍叔處毛

叔聃也疏

正義曰上言十人而此云八者伯邑考已死不數武王故八人尚書蕪公為司寇此

言康叔者為蕪公出封為國康叔替之注正義曰史記云聃季載杜云毛叔聃又不數叔振鐸者杜以振鐸非周公同母故不數之或杜

別有所見不以管蔡世家為說

曹文之昭也注文王

子與周公異母音義

昭上饒反說文作紹

晉武之穆也注武王

子曹為伯甸非尚年也注以伯爵居甸服言小音義

甸徒疏

正義曰於昭穆曹是晉之叔父也晉為大國練反疏多受分物曹為伯爵而在甸服非是尊尚年

長也桓二年傳云晉甸侯也晉亦在甸唯侯伯之爵異耳言為伯甸連言之耳於甸無升降也鄭玄云曹今濟陰定陶也去王城八百里東都之畿方六百里半之三百里侯服五百里定陶在畿外故為在甸服

言其小也

今將尚之是反先王也晉文公為踐土之盟衛

成公不在夷叔其母弟也猶先蔡注踐土召陵二會

經書蔡在衛上霸主以國大小之序也子魚所言盟

軟之次其載書云王若曰晉重注文公音義

重直龍反

魯

申注僖公衛武注叔武蔡甲午注莊侯鄭捷注文公

音義

捷在按反

齊潘注昭公音義

潘普安反

宋王臣注成公音

義

宋王臣如字本或作壬如林反

莒期注茲丕公也齊序鄭下周之

宗盟異姓為後音義

丕普悲反

藏在周府可覆視也吾子

欲復文武之略注略道也音義

覆芳服反

疏

正義曰言周家府藏之內

有此載書在也本或為盟府由僖五年傳藏於盟府涉彼而誤耳

而不正其德將如

之何長弘說告劉子與范獻子謀之乃長衛侯於盟

疏

正義曰正長也謂不長其有德者也釋例曰周之宗盟異姓為後故踐土之盟載書齊宋雖大降於

鄭衛斥周而言指謂王官之宰臨盟者也其餘雜盟未必皆然踐土召陵二會皆蔡在衛上時國次也至

盟乃正其高下者敬共明神本其始也是言會以國之大小為次至盟乃先同姓盟之先同姓者唯謂王官之宰臨盟時耳踐土則王子虎盟諸侯於王庭此盟則劉子在馬故二者先同姓其餘雜盟亦以國之大小為次故襄二十七年宋之盟晉楚爭先若其皆先同姓則楚不得競也以此知餘盟不然反自

召陵鄭子大叔未至而卒晉趙簡子為之臨甚哀曰

黃父之會注在昭二十五年音義

說音悅為于偽反下楚為沈同臨力

鴟反父音甫

夫子語我九言曰無始亂無怙富無恃寵無

違同無敖禮無驕能注以能驕人音義

語魚據反怙音戶敖五報

反疏

正義曰古者一字與二字並為一言易云伏羲作十言之教曰乾坤震巽坎離艮兌消息乾坤

雖是二字亦一出口乃得言之故謂之一言今則一字為一言三字以上為一句

無復怒注

復重也音義

復扶又反注同

無謀非德注非所謀也無犯非

義注傳言簡子能用善言所以遂興○沈人不會于

召陵晉人使蔡伐之夏蔡滅沈秋楚為沈故圍蔡伍

員為吳行人以謀楚楚之殺卻宛也注在昭二十七

年音義

員音云

伯氏之族出注卻宛黨伯州犁之孫嚭

為吳大宰以謀楚楚自昭王即位無歲不有吳師蔡

侯因之以其子乾與其大夫之子為質於吳冬蔡侯

吳子唐侯伐楚注唐侯不書兵屬於吳蔡音義

犁力兮反

嚭音鄙反乾其連反質音致

舍舟于淮內注吳乘舟從淮來過蔡

而舍之音義

舍音敝置也又音捨棄也注同汭人銳反

自豫章與楚夾漢

注豫章漢東江北地名音義

夾古洽反

疏

注正義曰漢書地理志豫章郡

名在江南此在江北者土地名云定二年楚人伐吳師于豫章吳人見舟于豫章而潛師于巢吳軍楚師于豫章又柏舉之役吳人舍舟于淮汭而自豫章與楚師夾漢此皆在江北淮南蓋後徙在江南之豫章

左司馬成謂子常曰子汭漢而與之上下注汭緣也

緣漢上下遮使勿渡音義

汭悅全反上時掌反遮正奢反

我悉方城

外以毀其舟注以方城外入毀吳所舍舟還塞大隧

直轅冥阨注三者漢東之隘道音義

隨音遂冥亡丁反本或作冥之

歧反阨於懈反本或作隘音同

子濟漢而伐之我自後擊之必大敗

之既謀而行武城黑謂子常注黑楚武城大夫曰吳

用木也我用革也注用軍器不可久也不如速戰史

皇謂子常楚人惡子而好司馬注史皇楚大夫司馬

沈尹戌音義

惡鳥路反
好呼報反

若司馬毀吳舟于淮塞城

口而入注城口三隘道之總名是獨克吳也子必速戰

不然不免乃濟漢而陳自小別至于大別注禹貢漢

水至大別南入江然則此二別在江夏界音義

陳直
覲反

下文及注同
夏戶雅反

疏

注正義曰禹貢云嶠冢導漾東流為
漢又東為滄浪之水過三澨至于大

別南入于江孔安國云三渚水名入漢大別山名觸山迴南入江如彼文大別在江北小別當近之小別當在大別之東也何則子常從小別與吳戰退而至大別明其自東而漸西也土地名小別大別皆闕不知所在或曰大別在安豐縣西南傳曰吳旣與楚夾漢然後楚乃濟漢而陳自小別至于大別然則二別近漢之名無緣反在安豐也

三戰子常知不可欲奔注知吳不可

勝史皇曰安求其事注求知政事難而逃之將何所入子必死之初罪必盡說注言致死以克吳可以免

貪賄致寇之罪音義

難乃旦反

十一月庚午二師陳于柏

舉注經所以書戰二師吳楚師闔廬之弟夫槩王晨

請於闔廬曰楚瓦不仁注瓦子常名其臣莫有死志

先伐之其卒必奔而後大師繼之必克弗許夫槩王

曰所謂臣義而行不待命者其此之謂也今日我死

楚可入也音義

卒子忽反下同疏正義曰臣見義則行不待

之謂也今日我致死而戰楚可入也

以其屬五千先擊子常之卒子常

之卒奔楚師亂吳師大敗之子常奔鄭史皇以其乘

廣死注以戰死音義

乘繩證反廣古曠反

吳從楚師及清發注

清發水名將擊之夫槩王曰困獸猶鬪况人乎若知

不免而致死必敗我若使先濟者知免後者慕之蔑
有關心矣半濟而後可擊也從之又敗之楚人為食
吳人及之奔食而從之敗諸雍澁五戰及郢注奔食

食者走不陳故不在戰數音義

溼市制反疏注正義曰五戰謂濟漢而

陳自小別至于大別三戰也柏舉也清發也此已五矣若復數雍澁則為六也傳例皆陳曰戰奔食而從之則食者走不暇為陳故不數也已卯楚子取其妹季芊畀我以出

涉睢注睢水出新城昌魏縣東南至枝江縣入江是

楚王西走音義

芊面爾反楚姓畀必利反世族譜季芊畀我皆平王女也服云畀我季芊

之字睢音七
疏正義曰世族譜季芊與丹我二人皆
餘反下同
平王女也服虔云季芊許嫁而字畀

我季芊字也禮婦人許嫁笄而稱字季芊稱字是許
嫁也蓋遭亂夫死而改適鍾建耳注正義曰睢地名
睢水出新城昌魏縣南發河山東南經襄陽至南郡
枝江縣入江此水在郢都之西楚王辟吳而西走

鍼尹固與王同舟王使執燧象以奔吳師注燒火燧

繫象尾使赴吳師驚却之音義
鍼之林反
燧音遂
疏注正義曰賈逵

云燧火燧也象象獸也以火繫其尾使奔吳師驚却
其衆使王得脫杜用其說也禮有金燧木燧皆取火
之物故以燧名火也說文云象長牙鼻南越之大獸
也南州異物志云象身倍數牛而目則如豕其鼻長
七八尺其所食物皆鼻取之性馴良為人所養夷人
服乘之史記大宛傳曰身毒國其民皆乘象以戰是

象可調馴楚近南邊故有此象王將涉睢吳師來偏
故便以火繫象尾令突吳師使驚馬却之執燧象者
既繫火於尾執而牽向吳師乃放之庚辰吳入郢以班處宮注以尊卑

班次處楚王宮室子山處令尹之宮注子山吳王子

夫槩王欲攻之懼而去之夫槩王入之注入令尹宮

也言吳無禮所以不能遂克左司馬戍及息而還注

息汝南新息也聞楚敗故還敗吳師于雍澁傷注司

馬先敗吳師而身被創音義

創初良反

初司馬臣闔廬故

恥為禽焉注司馬嘗在吳為闔廬臣是以今恥於見

禽謂其臣曰誰能免吾首吳句卑曰臣賤可乎司馬

曰我實失子可哉注失不知子賢音義

句古疏正義
侯反

我比來失子不知子有賢行臨
難能免吾首女今可守此言哉

三戰皆傷曰吾不可

用也已句卑布裳到而裹之注司馬已死到取其首

音義

劉古頂反
裹音果

疏

注正義曰言布裳到之是
司馬傷而自殺故云已死

藏其身

而以其首免注傳言司馬之忠壯疏

注正義曰謀毀
舟敗吳是忠也

雖傷猶戰不止是壯也

楚子涉睢濟江入于雲中注入雲夢澤

中所謂江南之夢音義

夢如字
又音蒙

疏

注正義曰土地名
云南郡枝江縣西

有雲夢城江夏安陸縣東南亦有夢城或曰南郡華容縣東南有巴丘湖江南之夢也郢都在江北睢東王走西涉睢又南濟江乃入于雲中知此在江南昭三年王與鄭伯田於江南之夢謂此也言江南之夢則江北亦有夢矣司馬相如子虛賦云雲夢者方九百里則此澤跨江南北

王寢盜攻之

以戈擊王王孫由于以背受之中肩王奔鄖鍾建負

季芊以從注鍾建楚大夫音義

中丁仲反鄖音云從才用反下同一音如

字

由于徐蘇而從注以背受戈故當時悶絕鄖公辛

之弟懷將弑王曰平王殺吾父我殺其子不亦可乎

注辛蔓成然之子鬬辛也昭十四年楚平王殺成然

音義

殺如字又申志反下我殺同蔓音萬

辛曰君討臣誰敢讐之君命

天也若死天命將誰讐詩曰柔亦不如剛亦不吐不

侮矜寡不畏彊禦唯仁者能之注詩大雅言仲山甫

不辟疆陵弱音義

如音汝矜古頂反

疏

正義曰詩大雅烝民美宣王之詩其章內

言仲山甫不如柔不吐剛也釋言云啜茹也舍人曰啜茹食也檀弓云啜菽飲水啜菽謂食藜藿也然則

茹者啜食之名

違彊陵弱非勇也乘人之約非仁也滅宗廢

祀非孝也注弑君罪應滅宗動無令名非知也必犯

是余將殺女鬪辛與其弟巢以王奔隨音義

知音智女音汝

疏

正義曰桓六年傳曰漢東之國隨為大土地名隨義陽隨縣其國在楚之東也土地名鄖江夏雲杜

縣則是楚之西南吳師猶尚在楚更東來奔隨國者蓋為楚與隨有恩謂可保守故也吳人從

之謂隨人曰周之子孫在漢川者楚實盡之天誘其

衷致罰於楚而君又竄之注竄匿也音義

衷音忠竄七亂反匿

女力反

周室何罪君若顧報周室施及寡人以獎天衷

注獎成也音義

施以鼓反

君之惠也漢陽之田君實有之

楚子在公宮之北注隨公宮也吳人在其南子期似

王注子期昭王凡公子結也逃王而已為王曰以我

與之王必免隨人卜與之不吉乃辭吳曰以隨之辟

小而密邇於楚楚實存之世有盟誓至于今未改若

難而棄之何以事君執事之患不唯一人注一人楚

王音義

辟匹亦反
難乃旦反

若鳩楚竟敢不聽命吳人乃退注

鳩安集也

音義

境竟音

鑪金初官於子期氏實與隨人

要言注要言無以楚王與吳并欲脫子期音義

鑪本又作

鑪金名音

慮是也王使見注王喜其意欲引見之以比王臣

且欲使盟隨人音義

見賢遍反下
注敢見皆同

辭曰不敢以約為

利注此約謂要言也此一時之事非為德舉故辭不

敢見亦不肯為盟主音義

約如字又於妙反

王割子期之心

以與隨人盟注當心前割取血以盟示其至心初伍

員與申包胥友注包胥楚大夫音義

包必交反

其亡也謂

申包胥曰我必復楚國注復報也申包胥曰勉之子

能復之我必能興之及昭王在隨申包胥如秦乞師

曰吳為封豕長蛇以荐食上國注荐數也言吳貪害

如蛇豕音義

荐在薦反數所角反

疏

注正義曰釋言云荐再也再亦數之義也

虐始

於楚寡君失守社稷越在草莽使下臣告急曰夷德

無厭若鄰於君疆場之患也注吳有楚則與秦鄰音

義

草莽舊作茅亡交反今本多作莽莫蕩反下同厭於鹽反疆居良反場音亦

逮吳之未

定君其取分焉注與吳共分楚地音義

逮音代分扶問反

若

楚之遂亡君之土也若以君靈撫之世以事君注撫

存恤也秦伯使辭焉曰寡人聞命矣子姑就館將圖

而告對曰寡君越在草莽未獲所伏注伏猶處也下

臣何敢卽安立依於庭牆而哭日夜不絕聲勺飲不

入口七日秦哀公為之賦無衣注詩秦風取其王于

興師脩我戈矛與子同仇與子偕作與子偕行音義

勻市灼反又音灼

疏

正義曰無衣刺用兵也秦人刺其君好攻戰亟用兵而不與民

同欲焉其詩云豈曰無衣與子同袍王于興師脩我

戈矛與子同仇鄭注云此責康公之言也君豈嘗曰

女無衣我與女同袍乎言不與民同欲也下注云君

不與我同欲而於王興師則云脩我戈矛與子同仇

往伐之刺其好攻戰又云豈曰無衣與子同澤王于

興師脩我矛戟與子偕作又云豈曰無衣與子同裳

王于興師脩我九頓首而坐注無衣三章章三頓首

甲兵與子偕行

秦師乃出注為明年包胥以秦師至張本

春秋左傳注疏卷五十四

春秋左氏傳注疏卷五十四考證

元年春王○

臣召南

按定無正月則此春王連下文三

月為句也注家解所以無正月之故截此二字疏亦從之其實當連下讀

晉人執宋仲幾于京師疏長歷推辛巳是正月七日也

○監本脫推字

傳將以城成周魏子蒞政衛彪僕曰一段○顧炎武日知錄曰此傳與昭三十二年傳共一事左氏兩收而

失刪其一耳周之正月晉之十一月也前傳曰己丑
士彌牟營成周云云此傳曰庚寅栽宋仲幾不受功
庚寅卽己丑之明日而傳分為兩年豈有遲之兩月
而始栽宋仲幾乃不受功者乎且此役又不過三旬
而畢矣

傳魏獻子屬役於韓簡子注簡子韓起孫不信也○臣

浩

按不信當是韓須之子須未及為卿先卒不信代
立者也史記韓世家宣子生貞子貞子生簡子然則

須卽貞子歟

傳孟懿子會城成周注不書公未卽位○趙訪補注曰
前年冬會而令役新年乃赴功無再書之法

傳晉女叔寬曰周萇弘齊高張皆將不免萇叔違天高
子違人天之所壞不可支也衆之所爲不可奸也○
趙訪補注曰女寬之言不明君臣之義非知天者也
晉伯宗亦曰天方授楚皆周末士大夫偷慢之言至
范鞅謂季孫有天之贊則又託以文其奸皆邪說也

臣召南

按趙氏此論最正信如女叔寬言將自古忠

臣義士皆違天乎哉

傳子家子不見叔孫易幾而哭○趙訪補注曰季孫逐
君君臣之義絕故子家子亦與季孫絕其不見叔孫
卽所以絕季孫也

傳吳人見舟於豫章而潛師於巢○

臣召南

按釋例土

地名謂豫章為淮南江北地甚確且與巢當亦不遠
也

公如晉至河乃復○程子曰意如上不請天子下不請方伯而立定公故晉怒而公往朝焉晉辭公而復明年因會而請盟于臯鼫

蔡侯以吳子及楚人戰于柏舉○孫復曰以者乞師而用之也吳稱子者大救蔡也晉合十八國之君不能救蔡伐楚吳子救之伐之吳晉強弱之勢較然故自是諸侯大小皆宗於吳

傳晉荀寅求貨於蔡侯○臣召南按晉自平公以後其

卿大夫皆貪求賄賂致失諸侯與楚囊瓦何異哉范
鞅荀寅穢跡尤著宜乎先四族而亡也

傳嘖有煩言○煩監本訛作頓今改正

傳祝奉以從疏尚書甘誓云用命賞于祖○甘誓監本
訛作其音今改正

傳夏后氏之璜疏古者分同姓以寶玉展親○寶監本
訛作珍今改正

傳五叔無官豈尚年哉注毛叔聃也○臣名南按傳既

曰聃季為司空矣謂之無官可乎不數曹叔振鐸而數毛叔聃此不可解孔氏揣杜氏之意謂叔鐸非周公同母故不數之亦未可信

傳夫子語我九言曰○王應麟曰古以一句為一言子大叔九言論語一言以蔽之曰思無邪是也秦漢以來乃有句稱今以一字為一言如五言六言七言詩之類非也

又疏古者一字與二字並為一言易曰伏羲作十言

之教曰乾坤震巽坎離艮兌消息乾坤雖是二字亦
一出口乃得言之故謂之一言今則一字為一言三
字以上為一句○臣照按此疏語必有舛訛乾坤震
巽坎離艮兌消息為十字曰十言孔氏乃以乾坤二
字為一言則九言矣又以此為十言之教何也

傳奔食而從之○

臣召南

按杜注以奔食為句林堯叟

以奔字為句食而從之為句言吳人即食楚軍之食
而從之戰也

傳九頓首而坐秦師乃出○

臣名南

按申包胥戰國策

謂之焚冒勃蕪莫敖子華曰昔吳與楚戰于柏舉三
戰入郢焚冒勃蕪贏糧潛行上崢山踰深溪蹠穿膝
暴七日而薄秦朝崔立不轉晝吟宵哭七日不得告
水漿無入口秦遂出革車千乘卒萬人屬之子滿與
子虎下塞以東與吳人戰于濁水大敗之卽此事也
臣照按管子申庶醫郢申庶當亦卽是申包胥蓋吳
楚之間人名非告于上國而史得書于策者大抵皆

有音無字隨紀載者所聞而書之申應申包胥楚分冒
勃蘓音皆似也

春秋左氏傳注疏卷五十四考證